

辯楚石禪師語錄卷第十六

侍者文斌等編

送全首座回仰山

須彌槌打處空鼓萬象森羅齊起舞驚倒南泉王老
師踈山失却曹家女寬時徧法界窄處不容針短綆
四五尺古井千萬尋莫謂仰山年代遠天宮正說摩
訶衍不知誰是白槌人夢裏覺來空眨眼大道體寬
無好無惡雜心意識叅出聖凡路學鐵牛背上括龜
毛石女腰邊裁兔角

C40
4514
(168)

B 64853

C40-4514

佛日普照慧辯楚石禪師語錄卷第十六

偈頌二

侍者文斌等編

送全首座回仰山

須彌槌打處空鼓萬象森羅齊起舞驚倒南泉王老
師踈山失却曹家女寬時徧法界窄處不容針短綆
四五尺古井千萬尋莫謂仰山年代遠天宮正說摩
訶衍不知誰是白槌人夢裏覺來空眨眼大道體寬
無好無惡雜心意識叅出聖凡路學鐵牛背上括龜
毛石女腰邊栽兔角

C40
4514
(168)

B 64853

東京大学総合図書館所蔵

五支那

法華經卷之六

一

五支那

9170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

送宗禪人回雪峯

天地與我同根萬物與我一體好箇脫洒衲僧切忌
坐在這裏不慕諸聖不重已靈解粘去縛拔楔抽釘
翻身烏石嶺觸目望州亭到家記取叮嚀問訊曾郎
萬福輓動三箇木毬嚇殺叅方瞎禿

送普禪人還閩

青山青白雲白欲識一貫兩箇五百福州名品荔枝
多是鶻崙吞却玄沙築破脚指頭直得通身白汗流
如今所謂善知識接物利生沙壓油脚未跨門先勸
破何須待踞燈王座五湖四海覓知音一曲陽春少

人和

送一禪人禮補陀

稽首補陀大士只這語音便是與麼接嚮承虛如何
出離生灰鈍鳥逆風飛一日二千里鐵樹夜開花朝
來還結子西瞿耶尼睡覺東弗于逮經行南瞻部州
打鼓北鬱單越搗箏且道是何曲調聽時却又無聲

送俊禪人

初祖見僧便面壁被人打破成狼藉壽山門戶向南
開件件現成殊省力要坐便坐要行便行譬如平地
掘甚溝坑衆生卽是諸佛諸佛卽是衆生不出一念

心徹頭又徹尾茫茫而地普天往往離波求水

送可禪人

卽心是佛無心道不覺全身入荒草語拙令人笑古
人古人却笑今人巧後生晚長忌聰明且要低頭學
老成却憶南泉好言語要渠癡鈍過平生初三十一
中九下七四溟東海流般若波羅蜜

送理禪人

如來無禪祖師無意枯木石頭泥團土塊老臊胡旣
道不識賣柴漢又云不會鳥窠初不離鳥窠打地一
生長打地跳出漫天網子名爲了事衲僧百尺竿頭

進一步壽山手裏有烏藤

送已禪人

過去諸佛已滅未來諸佛未生現任中間無佛且放
天寧話行天寧有甚麼長處業識茫茫無本據昆明
池裏失却劍却向西江撈得鋸拈來又是鐵蒺藜自
南自北隨風吹扶桑天子呵呵笑尺二眉毛領下垂

送性禪人之江湖

秋雨垂垂秋風颯颯或彼或此乍離乍合湘江那畔
鴈初來漁唱穿雲笛韻哀更有蘆花飛似雪遠山重
疊錦屏開咄哉漆桶不快喚作真如境界闍黎幸自

可憐生莫向宗門立知解

送匡禪人

三世諸佛不知有大地山河顛倒走狸奴白牯却知
有火中迸出紅蓮藕朝看東南暮西北落落盤珠無
影跡長連牀上飽喫飯坐臥經行不費力說妙談玄
也是癡本來無事出家兒江西湖南與麼去不須更
問毗盧師

送證禪人省親

父母未生以前追風木馬如煙無量劫來未悟任他
寒暑推遷萬年一念一念萬年神通妙用大道虛玄

頂上摩醯亞目途中道伴交肩總是發明這箇事金
烏長出海東邊

送淨禪人

繩牀走入枇杷樹須彌踣跳上天去不叅灰句叅活
句活句蹉過河沙數無所說師子吼有所說野干鳴
坐斷兩頭槩着鼻孔打開八字刺破眼睛水牯牛兒
甘水草從他岐路亂縱橫

送化禪人

本色道人行履處千人萬人把不住湘南潭北恣游
行拄杖一尋生鐵鑄所至解針枯骨吟秋風蕭索秋

雲陰諸方殺有善知識要辨龍虵須訪尋君不見潦
倒趙州年八十行行尚爲叅方急又不見馬祖一喝
大雄峯百丈聞之三日聾

送中竺恭藏主回東浙

近從中竺來却往四明去玲瓏巖接玉几峯揔是尋
常行履處大梅卽心卽佛寶陀聞熏聞修岳林一箇
布袋天台五百比丘寒山子往來華頂諾詎那坐斷
龍湫一大藏教陳葛藤自餘是甚椀脫丘火本無火
承言者紛紛自我鼇山店上喚師兄黃蘗樹頭生蜜
果

送天童證侍者再叅

烏窠吹布毛侍者便悟去天童親切句不要重指注
十月天漸寒早過西興渡相望一千里往復行大路
入室再叅時嗔拳須照顧

送應侍者禮補陀

眼聽聲耳觀色清冷雲中飛霹歷此是圓通自在門
衲僧幾箇知端的昔年未出扶桑時親見寶陀之聖
師再到海山溪處覓須彌頂上戴須彌

送瑛維那禮補陀

興化打克賓罰錢趁出院諸方舊話子反覆叅詳看

有耳誰不聞有眼誰不見露柱掛燈籠山門朝佛殿
橫拖拄杖去却繞鄞江轉築着脚指頭通身流白汗
宝陁巖上人日夜長對面咄

送高麗蘭禪人禮補陁

道人且以何爲道切忌區區外邊討外邊討得枉勞
神只箇心珠常皎皎吳水碧越山青白雲三片四片
黃鳥一聲兩聲三世如來提不起歷代祖師難下嘴
要見家家觀世音分明因我得禮你

送俊禪人浙東叅禮

學人自己遊山翫水雲門大師事不孤起此去浙東

尋訪誰肩橫七尺烏藤枝初登玉几謁舍利更向寶
陁叅聖師一二三四五六七六五四三二一傑出
叢林俊衲僧何須特地從人覓

送徑山英首座歸鄞

凌霄峯頭第二座摩訶衍法曾明破百非四句俱已
離白雪陽春有誰和直得含暉亭踣跳上梵天東坡
池吞却四明山驀然倒騎佛殿出門去碁盤石任苔
痕斑君不見寒山子歸太早十年忘却來時道又不
見明覺老無處討十洲春盡花凋殘珊瑚樹林日杲
杲

送炬首座遊台温

飲光論劫坐禪未免把纜放舡文殊三處度夏大似
遼天索價英俊道流去住自由朝遊檀特暮往羅浮
天宮說法了也知是般事便休人人釋迦彌勒箇箇
寒山拾得走徧天台雁蕩抹過山城海國從來鼻孔
大頭坐莫道相逢不相識

送孚侍者之浙東

新昌彌勒佛脚不離地走夜半過扶桑面南看北斗
却入天台雁蕩又到清涼補陀撞着寒山拍手聽他
拾得高歌阿呵呵呵呵依舊堂中疊足坐不勞萬

里涉鯨波

送信首座叅禮育王寶陀

離四句絕百非摩訶衍法誰當機能令寂子縮頭去
可使吾道生光燦東浙西州恣探討箇中誰了誰不
了果然識得本來人萬別千差俱一掃法身元無設
利羅方便示現降羣魔聞思大士應塵刹至竟不會
拘寶陀謾道石橫方廣寺未容薄地凡夫至瓊樓玉
殿絲雲間正眼觀來何足貴手點曇華亭上茶最先
勘破盞中花幾人麻上生繩想又復將繩認作蛇背
却天台遊雁蕩詎那尊者空遺像大龍湫與小龍湫

瀑雪翻雲千萬丈盡塵沙界一般天歷歷分明在目
前未動步時都歷徧誰能空費草鞋錢

送寶陀鼎維那

浙東山浙西水五湖四海皆自己明月高挑拄杖頭
寒雲亂踏芒鞋底從門入者非家珍勘破寶陀巖上
人蓋色騎聲也奇特一枝古洞莠花春此行迤邐回
天育去去優曇遠山綠爲我寄聲二尊宿出門未免
重叮囑

送順禪人并東乃師

蘇州有常州有兩兩不成雙三三亦非九有一句子
到你禿却我舌無一句子到你啞却我口靈利衲僧
知不知汝師自是真宗師如何棄却甜莠樹只管沿
山摘酸梨

送萬年楚藏主回日本

萬年一念一念萬年不在天台南岳亦非東土西乾
會得則風行草偃不會則紙裹麻纏本來無一物教
外有何傳昔入大唐來眼不見鼻孔今歸日本去脚
不跨船舫入海泥牛奔似電沿江木馬走如煙

送汀州文禪人

達磨西來不立文字見性明心落在第二還他出格

道流坐斷報化佛頭眼裏着沙不得水中捉月何由
諸方老宿河沙數學者擔簦如蟻慕拈却那吒第一
機其餘總是閑家具四海叅尋善知識談玄說妙空
勞力當陽勘破老毗耶一句了然超百億汀泉福建
明越温台門門巨闢法法全該老鼠滿地走抱取猫
兒來

送昱禪人回三平

父母未生已前好箇本來面目日用何曾欠少誰云
是事不足山又青水又綠早便起晚便宿烏不日黔
鴝不日浴拄杖但喚作拄杖屋但喚作屋莫問如來
禪祖師禪下里曲陽春曲昔日三平見大顛斷絃須
待鷺膠續

送弘藏主還徑山兼東西白首座

上上上上到崑高高處望望見青山起白雲雲山出
沒如波浪太華藏海知幾重重重重圍繞凌霄峯須彌
絕頂只這是耳聞迦葉敲金鐘百千萬億四天下信
手拈來無一把束作龜毛一管筆經頭一字如何寫
寫得分明說得親還他眼目人天人

送高麗順禪人歸國

普賢身中行一步超過恒河沙佛土昨日方離海岸

來今朝便往高麗去我此浙江何異汝鄉冬寒向火
夏熱乘涼達本心者頭頭是道昧真性者處處迷方
父母未生有甚麼與他辛苦擔皮囊効善財叅知識
禮文殊謁彌勒不知放下馳求心內外中間絕消息
或遊山或面壁或垂手入廬或韜光晦跡煨凡成聖
只須更拄地撐天也奇特順禪人須委悉紅日照中
春清風生八極

送欽首座南還

六祖到廣州寓正法性寺因舉風幡話略與二僧議
從此引葛藤蔓延南海地後人不解割一歲多一歲

珍重欽禪老頗有英靈氣叅方本無得問法搃不會
我保任此人高踞佛祖位

送叅侍者

叅須實叅悟須實悟好箇師僧便恁麼去靈山會裏
人總是天麒麟百千年滯貨拈弄越精神蹉過趙州
禪遭他文遠笑鬪劣不鬪勝驢糞中着到因思老古
錐節外更生枝一筆都勾下方爲跨竈兒吾家白雪
曲且要高人和佛祖出頭來與渠都按過

送寧侍者叅方禮祖

佛祖叢中無位次叅方行脚誰家事隨興一念便乖

張莫向禪門求意旨須知真正道人家到處忘懷愍
自他爛炒浮漚盛滿鉢却來石上種蓮花國師三呼
侍者三應呼兮應兮頭正尾正尋師必是達其源密
意明明在汝邊他日歸來無折合必須痛喫老爺拳
送雪竇榮藏主歸國
心地法門匪從人得便與麼去天地懸隔師子教兒
能返擲羚羊掛角無蹤跡以字不是八字非覺天日
月增光燭百尺竿頭五兩垂大唐又向扶桑歸火熱
風動搖水濕地堅固打破鐵圍山古今無異路臨行
何待重分付

送叅侍者叅方

佛法徧狂一切處莽莽鹵鹵河沙數鷲劄相逢喚得
回穿雲度水從君去頭上笠腰下包清風明月杖頭
挑不曾咬破一粒米萬兩黃金也合消開却門須識
主彼此相知何必舉背靠法堂着草鞋初非密室中
私語山未高兮海未深趙州文遠沒絃琴當時公驗
分明過四海誰人識此心

送越藏主

一大藏教只說這箇東土西天分明勘破我今以百
千萬億閻浮洲拈來掛在牀角頭揀甚麼新羅日本

佛誓流求闢浩浩冷湫湫有時放有時收收放縱橫
了無礙卷舒出沒常自由誰道客來無供養不妨滿
鉢炒浮漚

送志禪人

道人三次到來今始索吾長偈此事直下分明問渠
何須特地十方只在目前大道初非物外若也會卽
便會干木逢場作戲不會亦無欠少總自自家活計
踏着諸佛頂門拽脫祖師巴鼻四大海水壁立五須
彌山粉碎好箇大丈夫兒可與禪林增氣

送吳中滋禪人

蘇州有常州有歷歷面南看北斗主伴叅隨與麼來
象王回旋師子吼喫鹽聞鹹喫醋聞酸一有多種二
無兩般口中說食終不飽身上著衣方免寒不見道
家山好家山好家山內有無根草時當臘月正春風
五葉一花香未了

送中竺海維那

當念不生空諸有海坐斷釋迦文全超觀自在中峯
頂上鳴樾椎盡大地人俱絕疑陳如尊者有長處一
句分明舉似誰坐臥經行卷舒出沒齧齧之機如同
電拂三十三天築氣毬兩手扶犁水過膝

送廣南慧藏主

鎮海明珠只一顆如來藏裏深扃忽然突出拄杖
頭照見山河千萬朵若問此珠作何色圓陀陀分明
歷歷南山之南北山北直截示人人不識歸去來歸
去來依然高掛越王臺

送進禪人之浙東

百尺竿頭進一步家家門口長安路浙西之水浙東
山鵲眼龍睛多罔措是佛不識佛騎驢更覓驢我今
獨自往到處得逢渠畫蛇不必重添足六六元來三
十六

送東侍者之天平

天平卓筆峯最奇入門便看浮山碑其中九帶不到
十讀者未免心狐疑上人來自扶桑國慣見瑠璃浸
天碧夜半金雞啼一聲鼻孔眼睛俱打失走徧東西
與南北依然無處尋行跡

送常上人

秋風涼秋夜長井梧飄敗葉巖桂噴清香莫作世諦
流布切忌佛法商量便與麼玉殿瓊樓初無蓋覆不
與麼銀山鐵壁特地遮藏兩頭截斷十字縱橫却笑
長眉老尊者跏趺曾不下禪牀

送萬壽通侍者

通身是徧身是拈却無位真人坐斷空劫自己向上
一路不許商量討甚空花陽燄更尋虵足鹽香仲冬
嚴寒孟夏漸熱自古自今誰巧誰拙鳥窠吹起布毛
直下斬釘截鐵道人若也有疑歸家問取禪月

送淨慈道藏主還景德

黃面瞿曇不動舌縱橫四十九年說葛藤往往疊成
誰畢竟天無第二月一菴近日離南屏鷲劄問渠看
甚經只麼默然叉手處青天白日轟雷霆龍灣老龍
灣老叔姪相忘情更好鎮海明珠待索時與他傾出

一桤栳

送愚叟如西堂

本色住山人且無刀斧痕如斯三十載道譽塞乾坤
列下從前諸佛祖須彌槌打虛空鼓却完全揭示當
陽主中主亦不必論賓亦不必誇妙喜竹篔簹分背
觸誰能撒土更拋沙遇飯喫飯遇茶喫茶弟兄相見
豐儉隨家露地白牛甘草水草不妨到處納些些

送宗藏主

大士揮尺一下趙州繞牀一轉古今多少葛藤二老
當頭截斷寶華藏主飽叢林訪友尋師年歲深臘月

花開無影樹陽春曲奏沒絃琴東風急東風急上下
四維揆不入水底青天盡踏翻何曾亂打鞋頭濕

送聖壽政維那

不用低頭思量難得真不掩偽曲不藏直流出音聲
佛事豁開賢聖闡域洞山麻三斤雲門乾屎橛曾勘
諸方來必竟如何說拄杖如龍活鱗鱗橫拈倒用乾
坤潤

送淨慈壽首座還日本

富士山頭月祖龍溪上水月旣不來此水亦不往彼
正當水月交輝時萬里何曾隔一絲石女裁成火浣

布泥牛踏斷珊瑚枝有佛無佛俱是誑卽心非心盡
同謗教網高張未入微宗門直指還流浪所以道正
法眼破沙盆古今此道喧乾坤黃金滿國難酬價付
與休居的骨孫椿庭提起百禩碎不要被渠相負累
擲過那邊更那邊尋常只守閑閑地便與麼實奇哉
諸方大可笑嚼飯喂嬰孩但恐空中釋梵來曇華又
爲無心開

送延壽梓知客

臨濟大師賓主句趙州見僧喫茶去旋風頂上屹然
棲走徧天涯不移步九九從來八十一尋常顯示尤

綿密撐天拄地丈夫兒手眼通身赫如日

送蔣山澄知客

獨龍岡頭跳珠峯下客來須看賊來須打還上古之
風規贊升平之法社師子之爪旣呈羚羊之角斯掛
善能和其光同其塵自可忘其情絕其解螭螭吞却
妙高山草庵卸下瑠璃瓦

送日本易上人

已躬下事元明白動念却成雲水隔老胡謾自度流
沙不會當頭箇一着日日日東上日日日西沉何用
有口說無絃方是琴道人拄杖握在手是聖是凡劈

春樓掇轉扶桑作大唐驚起法身藏北斗

送靈隱福藏主

三業清淨佛出世步步踏着黃金地三業不淨佛滅
度黃金地上難移步與麼與麼當陽明皎皎不與麼
不與麼徧界黑漫漫兩處牢關打脫千里藏海枯乾
阿那箇是菩提煩惱喚甚麼作生灰涅槃盡大地人
齊斫額飛來峯月照人寒

送亮侍者叅方

國師三喚侍者侍者三應國師蚯蚓抹過東海藕絲
穿却須彌從來此道無今古不動纖塵超佛祖迷也

悟也何必云語兮默兮自看取春風日夜吹天地是
處園林變紅翠一一交羅帶網珠頭頭揭示靈山會
咄

送觀首座

雲門未到靈樹已見知聖大師首座悟道了也一對
無孔鐵鎚前無釋迦後無彌勒聖固難知凡安可測
且道悟箇什麼面赤不如語直七月八月秋風涼千
山萬山客路長太平庵中疊足坐任運施爲無不可

送雙林湛侍者

來也與麼來去也與麼去佛祖不爲人古今無異路
尋常喫飯喫粥何待說性說心端坐受他供養日消
萬兩黃金打破大唐國覓一箇會佛法底了不可得
我見兩箇泥牛鬪入海直至如今沒消息

送靈隱聚藏主

冷泉湯湯廣長舌無晝無夜無間歇必竟不知何所
說卷盡五千四十八塞却耳根作麼聽聽得分明心
路絕 心路絕處正眼開燈籠泐壁上天台

送默維那

雲峯見翠巖投誠而入室豈無娘生口不肯爲渠說
一朝桶箍爆通身白汗出披衣上方丈且喜大事畢

撰述
卷十一
汝自象山來問吾求旨訣置之襍務中擾擾經歲月
拋却土木場使就維那職職滿要叅方須依善知識
西川復東浙畢竟承誰力

送隆侍者

此事分明非授受靈光一點從來久釋迦迦葉同處
空少室神光亦何有吾負汝兮汝負吾侍者三應國
師呼我狂大唐汝日本半夜飛出金老烏

送四明瑞巖潤藏主

從來無一法海口莫能宣霜風卷黃葉喚作止啼錢
若遇明眼人且拈放一邊撲碎摩尼珠大海浮鐵船

能可空兩手不爲物所纏經行及坐臥在處莫非禪

送久藏主游天台雁蕩

佛佛授手面南看北斗祖祖相傳鑿石種紅蓮一氣
轉一大藏教水流濕兮火就燥萬里風搏海上鵬幾
年霧隱山中豹益無所益爲無所爲拔苦與樂興慈
運悲黃檗樹頭得蜜果沒底籃子盛將歸直下是休
揀擇新羅在海東日本多商舶發弓飲羽兮兩岸俱
玄鞭石吼升兮纖毫不隔台岳雲浮點點青蜃江月
汎茫茫白

送玳侍者還里

鳥窠吹布毛便有人悟去而今作麼生莽鹵河沙數
玃禪旣磊落須會超方句見色與聞聲不可第二度
秋風吹木犀鬚鬆開滿樹夢裡忽聞香覺來無覓處
翻身模著枕元是木頭做便與麼承當重疊關山路

答道場清遠禪師

吾姪僧中龍爲人施法雨根雖有利鈍心本無差互
壁立萬仞表青山常獨露誰言師弟子此事須密付
達磨不會禪妙喜亦非祖處處是道場何勞辨能所
勉之從今日高步追前古

寄尼孫靜山主

我有一機向上全提超佛越祖海裡須彌天上天下
知之者寡擬議不來劈脊便打五祖鄧師翁掃除臨
濟宗圓悟與大慧一一龍生龍有箇尼無著至今流
正脉古今常現前看是何標格

送道場澹藏主

心不是佛智不是道天上人間何處尋討西齋今年
六十八分明一老一不老慚愧青山人相看寂寞濱
問余有甚奇特處追風鐵馬戴麒麟昨夜月輪如火
熱晒得烏兒白似雪天真靈妙不思議一語標宗言
下徹

送智門斯道

眼有三角頭峭五岳枯木糝花炎天飛電旣善解粘
去縛不須續鳧截鶴斯人斯道今千載一時日月
面兮古之今之句後聲前竟莫測棒頭喝下終無私
君不見老智門彈一曲斷絃更待何人續蓮華荷葉
甚分明也是謝君顛倒欲

示徒弟心安叅方

一人所在亦須到半人所在亦須到入門休問主是
誰看渠開口提綱要一言相契便叅堂不憚辛苦充
街坊縫箇布袋馱齋糧朝叅暮請聽舉揚出家只要

了心地終不啻他名與利古德皆從恁麼來後生晚
長須睇驥泰山之石瀟瀟穿蟠菟著花三千年忽然
水底火燒天那時歸來喫痛拳

送日本春侍者

七佛已來皆有侍者輔弼宗師作法社香林在韶
陽聞指示暗抄臨濟驗洛浦拽拄杖便打拚性命斷
知解豈肯認奴作郎隨他指鹿爲馬近來車載斗量
漫說雲興餅瀉春禪幸自英靈見地須交脫洒忽然
光明盛大可見風流儒雅何也阿魏無真水銀無假

送進付者

9 170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

疎山賣却布單三千里外行脚忽然打破漆桶恰似
虎頭生角進禪得得來中州三萬里截滄溟流解笑
瞎驢趁大隊倒拈拄杖風颼颼扶桑那畔一輪日直
至黃昏後方出戳瞎摩醯頂門眼東土西天無祖佛
送用首座

道人日本來將甚麼過海有語涉商量無言成窒礙
譬如金翅鳥王須彌頂上翱翔不學栖盧鈍鳥單飛
只戀池塘摩訶衍法如何說四句皆離百非絕楊柳
絲絲舞碧煙梅花片片飄香雪

送權維那

三世諸佛不知有一一面南看北斗狸奴白牯却知
有拈得鼻孔失却口袖裏金鎚未舉時分明超過毗
盧師忽然一下百禩碎石虎吐出木羊兒渠渠渠我
我我折旋俯仰無不可識得西來祖意傳白雲影裏
青山采

送志侍者

短歌數十丈長句三兩言不長又不短石火迸青天
圓悟作侍者何曾參得禪當時鄧師翁未免所見偏
法久乃成弊須忘魚與筌後生逐隊走紙屨仍麻纏
決擇要明白卷舒機用全道人日本來可拍佛祖肩

駿馬不受羈長途自騰騫日馳三萬里頃刻撫八埏
妙喜鼻皮襪楊岐金剛圈臨濟正法眼滅向瞎驢邊
鼻孔略彷彿諸方誰敢穿

贈前西隱玉礪血書華嚴經

毗盧性海無邊表非古非今非大小有時捏聚一毫
頭血滴滴地從揮掃有時伸作廣長舌一卷百番宣
未了玉澗老金溪寶如來樣向心中造善財童子未
知歸度水穿雲謾尋討當砌華映簾草雪白菟麝香
裊裊自然覺者處其中終不隨他打之繞

次韻贈西隱白石

釋迦掩室金粟無言同條共貫拔本塞源聞無聞見
無見如投師子一滴血六斛驢乳皆星散藏中自有
摩尼珠須知不在龍宮殿襟懷蕩蕩眉宇津津滄溟
半勺大地纖塵直得飛來峯踣跳壑雷亭下雨翻盆
佛日普照慧辯楚石禪師語錄卷第十六

音切

緬

古杏切

搗

楚九切

鄣

五斤切

麗

郎計切

迤

徒何切

運

力綬切

黔

巨炎切

矜

魯丁切

屹

魚乞切

舶

捕格切

晞

許機切

驥

居致切

埏

以梅切

嘉興優婆塞張明廣男張科會勸衆信張守仁
壽明宗徐元轅顧維銘錢民慧徐氏
郁仁共施銀刻此
楚石禪師語錄第十六卷 昆明沙彌真玄對
真州王國英書上元梁城玉刻
萬曆庚寅秋五臺山妙德菴識

佛日普照慧辯楚石禪師語錄卷第十七

偈頌三

侍者文斌等編

贈五臺體法師

惟一文殊無二文殊百萬億徧滿塵區或作老人
或爲童子或在山林或居屠市或乘獅子跨空行或
現光明從地起法師久矣駐五臺一雙淨眼長舒開
黃金雖貴著不得六凡四聖皆塵埃如今更莫思量
著六用門頭空索索不坐禪不看經白雲自白青山
青飯罷繞廊行一轉刹那圓滿菩提願

送徒弟嶽書記叅方

當年洛浦辭臨濟不比尋常赤稍鯉未落夾山壑甕
中好將一喝重扶起嶽禪卓錫秦水濱再涉寒暑忘
艱辛何獨叢林重名節灼然父母非我親黃龍只是
南書記道德文章可名世還他直截老楊岐流出曾
襟蓋天地

送有侍者游天台

天台一萬八千丈正眼觀來平似掌不待崎嶇走路
岐塵塵剝剝皆方廣頭上笠腰下包青山綠水長道
遙衲僧本自無羈絆萬兩黃金也合消

送虎丘應藏主

真叅第一著妙悟第一藥若是過量人其心自昭廓
虎丘掃蕩邪見師電光石火舒先機伶俐衲僧俱直
截不須更問今何時大藏小藏從此去豈有意根椿
立處十字街頭沒底鞋千年石上無根樹

送淨慈海藏主

永明門前一湖水更有荷花香十里三世如來說不
到一大藏教提不起禪和未許亂承當却是虛空解
舉揚塞却耳根何處聽舌頭不動語琅琅諦觀堂上
老師偈勿以區區情識會昨日下雨今日晴張公喫

酒李公醉

送印侍者遊南岳

君不見馬祖坐禪圖作佛奈何無事尋窠窟讓師渾
不費鈞錐平白家財遭籍沒又不見五百比丘常在
定彌猴各佩菱華鏡問君底處是諍訛切忌逢人說
邪正盤陀石上青松根日輪卓午天無雲曜古騰今
只這是跣趺印出莓苔痕放卽收收卽放天下衲僧
爲榜樣新羅依舊海東邊門口不在舌頭上七十二
峯皆可游異花靈草無春秋石橋踏斷成兩截方見
橋流水不流

送心姪叅方

慈明窺身火隊中只要勘辨汾陽翁半夜亾親索祭
祀明朝大嚼盃盤空其時在座多象龍未免散去隨
西東滾滾百川流入海皮膚脫落眞實在將軍疋馬
過袁州臨行記荊增光彩如今滿地皆兒孫未有一
人能滅門壽山但道看脚下佛祖不勞開口吞

送雲居玉維那禮補陀

玉禪南方轉一遭會佛法底如牛毛拄杖頭邊撥得
着爲渠畫斷天雲高撲滅祖燈掃除胡種諸聖不慕
已靈不重連城白壁本無瑕滿掬摩尼爲誰捧嘗愛

疎山老解云肯諾不得全又聞雲居翁閨閣中物須
棄捐破家散宅作活計透出威音王以前天台南石
橋北觀音院裏有彌勒發揮二十五圓通屋角莖花
露春色

送義藏主

你問訊了一邊立地不是如來禪亦非祖師意用時
便用沒商量說甚了義不了義衆生本來是佛更要
靈山授記七縱八橫遠問近對如此師僧果然伶俐
等閑撒出摩尼珠直得神光照天外

送玄禪人之江西

馬祖自從胡亂後分明對衆揚家醜來來去去是龐
公吸盡西江不開口方外八十有四人搖頭擺尾皆
金鱗却從平地起波浪大坐當軒據要津殘羹餽飯
不知數縱展炊巾無着處好提古劍髑髏前日炙風
吹全體露

送成侍者叅方

侍者叅得禪我未敢相許職滿說游方臨行求贈語
後生真可畏老僧全望汝諸方善知識說法如雲雨
行脚要帶眼入門須辨主壽山一句子請分明記取
送大藏主歸里奔喪

父母俱亡覓偈奔喪誰是報恩者何處是故鄉行徧
天涯海角沒叅學處叅學十方不離目前只麼寂寥
寬廓君不見荷澤師走向僧堂裏白槌摩訶般若未
開口露柱燈籠已哮吼

送晟侍者

秋風處處飄黃葉正坐蒲團縫壞衲道人別我去游
方三度問渠渠不答試看如今是甚時千鈞祖道懸
於絲師求弟子固未暇可有弟子求其師君不見投
針徹底驚龍猛叉手向前叅瑞像拈得山僧兔角杖
他年卓在孤峯上

送彛藏主

一大藏教是切脚平上去入切不着釋迦老子口門
窄煩惱菩提盡拈却在叢林黃葉落生天癩狗翔
雲鶴從他夷岳而盈壑且把烏藤束高閣

送淨慈顏藏主游廬山

拈起一片木葉移來一座廬山古人眞實相爲且免
區區往還着草鞋拖拄杖游州獵縣極意妄想若是
出格道流必然別有伎倆恁麼中不恁麼擊木無聲
不恁麼中却恁麼敲空作響欲知廬山高更聽廬山
謠百億瞻部洲都廬入秋毫東西二林在山北自古

遠公標勝跡結社同修十八人臨終盡向蓮華國南
則歸宗開先萬杉栖賢羅漢慧日六剎相連五老峯
明月泉香爐師子金輪玉淵遙瞻瀑布不可近迸雪
崩雷崖石穿千樹萬樹青松交加屈曲一箇兩箇白
鶴鼓舞蹠躑滿地嘉華美草隨時瑞靄祥煙何消尊
宿開口但管森羅說禪不是長行短偈亦非直指單
傳華五宗之舊轍掃諸祖之顏傳針眼魚吞大千界
扶桑人種陝西田

送聰禪人

出門步步清森起一棹鐵船三萬里大魚剛被小魚
吞縮却龍頭展虵尾未到中原俱歷徧浙山如黛江
如練臨風側耳聽鄉談故國依然海西岸佛不論先
後道不揀精麤禪不屬迷悟智不得有無釋迦彌勒
是他奴那箇男兒不丈夫

送大慈讓維那

折旋俯仰須臾頃抹過普超三昧頂靈利衲僧終不
凡徧叅豈爲觀風景一毫端上慈雲峯草鞋踏破山
重重當年法戰旣得勝後來自可與吾宗陷虎之機
險崖句何待西齋再分付

送中天竺吾藏主還日本

初來大唐國此道已圓成而況歲月多煨煉金愈精
添不得減不得應用恒沙有何極莫問凡流與上賢
誰論大智并情識西湖之水西湖山動靜不離方寸
間月在中峯夜將半天香桂子誰能攀亦不喚作心
亦不喚作佛亦不喚作半滿偏圓亦不喚作照用權
實撥轉船頭是故鄉龍吞不盡瑤璃碧

送儀侍者游天台鴈蕩

前釋迦後彌勒心不見心無相可得出門綠水青山
到處花紅草碧如斯舉似魚魯叅差直下承當天地
懸隔寒山子道千年石上古人蹤萬丈巖前一點空

此一點空不可取天台鴈蕩隨西東衲僧行脚休輕
議略以虛懷標此位非凡非聖強安名高踏毗盧頂
上行

送伊藏主游四明天台

出門拈起拄杖子不擇山林與城市第一穿過玲瓏
巖先聽主翁敷妙音翻身直上玉几峯踏着從前自
家底八萬四千設利羅須知不在金墪裏好風穩送
寶陀船刹利塵塵逢大士訪雪竇游清涼觸目無非
聖道場天寧定水善知識師子哮吼羣狐藏霞城豈
獨觀風景五百聲聞須喚醒一一教他出世來開中

不礙身心靜直饒茶盞現奇花也待衆生心自肯國
 清三聖誰不知興發到處題新詩虛空作紙大海墨
 稻麻竹蒿皆毛錐諸方說禪浩浩地解舉此話今其
 誰滑石橋難措足下有龍蟠無底谷多少游人不敢
 窺懸崖日夜飛銀瀑舉頭更望華頂雲千里萬里長
 相逐摩挲拄杖又向西州還一毫頭上忽然突出須
 彌山

送諸侍者游天台鴈蕩

台山青雁山碧滿眼滿耳非聲非色先過嵎縣禮彌
 勒莫道通身是崖壁撐天拄地更有誰往往示人人

不識試點五伯羅漢茶一枚盞現一枝花分明拈出
 這壹著多少師僧蹉過他游華頂了國清去名藍正
 在幽深處豐干寒拾面目真屈曲寒藤上高樹欵欵
 行入芙蓉村奇峯峭壁雲吐吞靈巖左右十八寺寺
 寺皆有山當門詎那終日抱膝坐仰觀瀑布從空墮
 勿云尊者不說法撒出驪珠千萬顆逐事與君提話
 頭如今不了何時休大唐國裏無佛法看取鐵船水
 上浮

送壽禪人

真正舉揚誰辨的白雲鎖斷寒山色叅方衲子太涅

惺別起眉毛雙眼碧有祖以來提唱多而今莫問如
之何饑餐渴飲無餘事脫却籠頭卸角馱

送吾禪人

古藤橫瘦肩兩屨踏殘雪陽鳥啼未休春山若爲別
朦朧睡眠何處開應向前途指明月

送日本建長佐侍者之廬山

大唐國裏宗乘未有一人舉唱信手拈起布毛慚愧
鳥窠和尚此話傳來幾伯秋五雙十箇徒悠悠燈籠
露柱太饒舌萬象森羅齊唱酬此行舟過湓城口峯
頂已聞獅子吼五老同時笑展眉瀑布不溜青山走
除却平常與奇特達人作麼通消息倒騎鐵馬上須
彌羸得清風生八極

送明禪人叅徑山兼柬古鼎和尚

近離何處來曾到此間否不許俊衲僧人前亂開口
天寧拄杖子未免劈脊樓決不至三十但打二十九
留一棒自喫諸方若爲剖凌霄老宗匠管取橫點首
不作野干鳴亦非師子吼若人會此意堪續牟尼後

送日本侍者

大唐日本東西國一樣眼橫并鼻直海底泥牛摘角
牽雲中石女拋梭織日禪幸自可憐生卻道西來有

消息西來本也無消息平地茫茫種荆棘文遠何曾
見趙州善財亦不叅彌勒

送天寧元首座

靈山第二座不與諸方同解笑小釋迦夢昇兜率宮
百非及四句落落開談叢說處却成默塞時無不通
毒蛇吞蠶鼻猛虎咬大蟲坐斷佛祖舌初非修證功
三冬枯木秀九夏雪葉紅持此似老僧將以明已躬
直下兜一喝未免三日聾三日聾尚可嚇殺東村翁

送中竺宏侍者

大機大用無傳授誰解金毛獅子吼千歲巖頭七十
翁通身是眼通身手若道今年已涅槃男兒終不受
人謾犀牛扇子依然在直得清風滿座寒

送徑山一藏主

一大藏教閑葛藤盡大地人跳不出夢庵本是奇衲
子夜半扶桑吐紅日拈起凌霄峯頂茶却是洞庭湖
上橘三千世界庵摩勒放開捏聚誰能詰松風礮水
自談玄却笑區區論權實權非權實非實白雲道箇
鉢囉娘帶累兒孫空受屈

送中竺岳藏主

道人特地咨叅我有我有人成話墮纜跨門來剔起

睂分明寶藏開金鎖唐國之西日本東都盧攝在微
塵中珊瑚樹林知幾幾照見海日三更紅釋迦四十
九年說貴買朱砂畫明月中竺果然機用別金剛寶
劍當頭截

贈遠侍者

佛佛授手祖祖相傳黃頭碧眼白日青天動念卽乖
開口卽錯不用續鳧截鶴何必夷岳盈壑叅之者離
心意識叅學之者出聖凡路學昔年日本來紅爐一
朶芙蓉開此日諸方去鐵鞭擊碎珊瑚樹東西南北
任縱橫贏得清風布地生

送靈隱文藏主

古釋迦不先今彌勒不後兔角不用無牛角不用有
何人同得入與誰同音吼叨叨四十九年說帶水拖
泥裙半截出格還他俊衲僧打刀須是邠州鐵眼對
眼機對機冷泉收得摩尼歸逢人傾出一栲栳白日
青天雷電飛

送慧藏主

入門便捧德山老入門便喝臨濟師子孫一一滅胡
種曠大劫來曾絕疑此行正值風帆便吹落梅華三
五片一大藏教只說這箇法趙州老人空繞禪牀轉

且喜南湖職已圓
拈華百萬人
天前飲光笑眼自開
合良馬不用珊瑚鞭

送日本丘侍者之金陵

十月朔風號古木
金陵遠也行何速
菩提達磨未來
前淮北淮南山簇簇
不立文字直指人心
盲龜值木
輓芥投針從本以來
無佛祖了知此事
非今古國師
侍者意如何
汝負吾兮吾負汝

送端侍者

趙州文遠侍者白雲清凝
二師相與作成法社象王
獅子交馳靈山幸自龍鐘
了左右無人話懷抱慚愧

端禪日本來鐵牛不喫欄邊草
朝來問訊客至燒香
上一畫短下一畫長
若更近前求指示
山僧正值接官忙

月菴

天上月水中月
惟一月無二月
再三撈漉也無端
十五團欒又何別
憶着當年馬大師
渾家共翫清秋時
南泉拂袖便歸去
豁開戶牖當軒
誰數伯年來無此
作遇夜纔昇曉
還落自家屋裏
暗昏昏向外馳
求都是錯
喚回頭爲伊道
靈光一點同昏曉
燦天鑑地如未知
江北江南問王老

雲海

未明雲海直截且就一波上說一波動則萬波生一波止則萬波滅所以衆生煩惱不離生滅一法到得諸佛之地煩惱翻爲智慧智慧煩惱本虛衆生諸佛皆如却向其中指出浩浩滔天沃日滔天沃日也無端未審流從何處畢或時作伯億洲中盡潮落或時乾三千界内起波瀾海雲大士觀雲海但見重重無障礙我觀雲海初不同顛倒日月吞虛空聲聞不是馬兔菩薩亦非象龍釋迦老子謾多口欲談雲海詞先窮謂之雲非五色謂之海絕涓滴碎須彌消劫石盡未來時不可測不可測對現分明有何極

雲庵

雲兮飄忽太虛出沒謂其出也本無心謂其沒也離窠窟或從龍千里萬里長相逢或抱石一片兩片不可覓水邊林下露崑奇好手丹青誰貌得收來直是沒纖毫放去從教吞八極一有多種二無兩般遠在方寸近隔大千凡夫不證法雲地聖人不住無雲天德雲長在妙峯頂海雲普應衆生前百市千重是何人境界左舒右卷乃列聖機權君不見關西子沒頭腦假號雲庵顯其道佛手未伸驢脚開灼然孤負黃

龍老汝今亦復號雲庵此義蒼茫吾未了三問渠儂
三不知白雲依舊連芳草

鏡庵

有一物黑似漆明如日六窻無處着塵埃萬象不能
逃影質東平盡力撲不碎靈利師僧欠靈利獼猴各
佩古菱花落落神光照天地胡來漢現幾經春認主
人人是甚人更問中間并內外無塵未免又生塵

古航

陰陽未判形殼未離上無片瓦下無卓錫敢與龍王
鬪富從教衲子生疑不此岸不彼岸不住中流隨機
應變揚清激濁兮浪靜風恬滅跡收聲兮雷奔電轉
三世諸佛知不知六代祖師見不見擬議隄防驀口
撓遂巡賣弄竿頭線便與麼涉波瀾不與麼隔關山
兩頭坐斷乾坤闊一棹江西十八灘

無文

始從鹿野苑終至跋提河未嘗談一字笑倒病維摩
維摩大士默然處演出演入河沙數三十二說徒紛
紛一切數句非數句缺齒老禪面壁九年分皮擘髓
漢語胡言直饒以龍龕手鑑唐韻玉篇從頭註解解
不得自攜隻履歸西天冬瓜印子傳來久古篆分明

撰述
現不詳卷十七
十四
拈在手上一擊百襍碎露柱燈籠盡哮吼錢塘十
月天風高示余頌軸如牛腰白者是紙黑是字香墨
何曾蘸紫毫

斯道贈萬壽由藏主

佛佛授手祖祖相傳直下便是不涉言詮所以匠徒
領眾因而說妙談玄譬如接竹打月又似膠柱調絃
分明日用中逼塞虛空內築着又磕着誰會誰不會
貴如土賤如金須彌山未高大海水未深東西南北
謾叅尋塵世幾人知此心

梅隱

七伯年前老古錐松花爲食荷爲衣人皆欲見不可
得茆屋四面青山圍採藤衲子忽然到口縫纔開遭
怪笑從此惡名傳世間誰知出語無玄妙卽心卽佛
錯承當非心非佛也尋常殘羹飯誰肯喫好肉更
來剗作瘡有佛處不得住無佛處急走過勸君莫學
守株人七箇蒲團空坐破

大徹贈中竺齋藏主

大徹投機一句子突出咽喉與牙齒藕絲竅裏騎大
鵬雉螳眼中放夜市片言不爲少全藏不爲多燈籠
見露柱拍手笑呵呵虛空撲落在地上鉢盂開口吞

山河蜜怛哩孤蜜怛哩智一字不着畫兄弟添十字
當年黃檗太無端六十蒿枝打臨濟

松石贈中竺貞書記

青松落落白石鑿鑿上摩星漢下帶雲壑若使爲棟
爲梁爲政事之堂爲珪爲璋爲公侯之光不知道人
無事日與松石相忘清風起而龍吟芳草映而虎踞
紅塵鬧市任喧譁家在青山更深處

無相贈日本訥藏主

法身無相直下分明眼不見色耳不聞聲雖是不聞
不見却解隨幾應變自從打破太虛空舜若多神常

對面

龍淵贈驪藏主

龍無龍句淵非淵句要問龍淵在甚麼處盡大地是
浪忽青天起雷日月陡黑山岳傾摧散四海五湖之
甘澤活三草二木之枯芟葉公不解描貌未免將錯
就錯赤手誰來得領珠古今不露真頭角

無外贈日本巖藏主

有不有空不空聖凡總在圓光中浮幢王刹香水海
莫問南北并西東一卽一切一切卽一亘古亘今誰
得誰失都盧只在毫端却向那邊尋覓縱然覓得亦

非真直下分明能幾人諸佛假言三十二切須體認
本來身

鼇山贈仙巖金長老

有鼇山兮甚奇特鎮黃巖兮浮翠色峭崔嵬兮高削
岩直上雲端望何極君不見雪峯昔遇巖頭老三十
年來盡傾倒流出曾襟蓋天地鼇山店上方成道龍
鱗鱗魚鱗幾番滄海飛紅塵叱嵐猛風鼓不動十
洲三島長如春

古木贈榮藏主

天地未分時槎牙第一枝閭浮雖有樹爭奈結根遲
幾回寒幾回熱柯似青銅葉如鐵挺立何愁動地風
高標可怕連山雪榭楠杞梓總凡材莫不皆從尺寸
栽不是千年萬年物轉頭便化爲塵埃莊生之椿今
已朽少林之桂君知否撐天拄地是何物一一面南
看北斗

心源贈悅維那

三點如流水曲似刈禾鎌佛祖莫能說餘人誰解拈
吾聞寒山子有偈非極談徒然掛唇齒秋月照碧潭
更誰知無物比冷涵空兮清徹底回光返照剎那間
一脉本從何處起

碩林贈中竺果首座

睦州老人識臨濟陰涼大樹親授記果然蓋覆天下
人今日兒孫鋪滿地一一高枝撐太空重重密葉來
清風碩林挺出萬物表非與尋常花木同徧界冰霜
渠不受隨時變異渠不朽等閑鳥獸那敢栖長有金
毛獅子吼

大機贈日本全藏主

大機須兼大用說機用直教心路絕德山一棒山岳
崩臨濟一喝虛空裂君不見長沙岑大蟲作用不與
諸方同寂子親曾舉到此被渠一踏傳無窮道人素
有冲霄志發明宗門向上事等閑拈起蒺藜槌百億
須彌成粉碎

無盡贈登山主

百億三千大千界拈來地上土一塊虛空尚有消損
時塵世光陰易凋謝不滅不生唯此心縱經曠劫長
如今如今直至未來際却笑目連窳佛音

智隱贈愚禪人

有無但較三十里晦跡韜光樂於已詔書飛出鳳凰
樓三度入山徵不起聖人具足凡夫法凡夫具足聖
人心非凡非聖盡超絕路在白雲深更深

無隱贈吾禪人

日用堂堂全體露着衣
喫飯朝還暮靈山拈起一枝
花伯萬人天皆罔措色且不是
色聲且不是聲描也描不就
畫也畫不成只在目前休外覓
青山綠水轉分明

思遠贈日本聞侍者

一念普觀無量劫無去無來亦無住
三際求之不可得生鐵稱錘被蟲
蛀達磨度流沙特地到中華雖云
十萬里畢竟不離家饒君走徧浮
幢刹南北東西沒差別寒則普天
普地寒熱則普天普地熱這一處
心行滅虛空包不盡千聖莫能說
靈利衲僧知不知不知却問天邊
月

桂巖贈日本淨居月長老

月中桂子飄巖幽長成一樹二千
秋秋風吹開枝上花花所及處清
香浮月公本是管公喬道譽之香
塞天地金粟如來夢幻身不須更
受菩提記

絕照贈用首座

淨俾俾絕承當赤洒洒沒可把龍
潭吹滅紙燭時眼光燦破四天下
日月不到處乾坤難覆藏三千大
千界正體露堂堂緣見因明暗成
無見明暗兩忘心靈

百變目前無闍梨座上無老僧一念不生三際斷扶
桑夜半日輪昇

香山贈果長老

五分法身收不得非梅檀也非蒼荀妙峯孤頂露堂
堂少室真機明歷歷嗅着能令鼻觀通白雲掩映碧
玲瓏花開葉落年年事依舊須彌聳太空

中山贈穎首座

乾坤之內宇宙之間丹青莫狀手足難攀通上既孤
危直下尤峭絕曠劫無動搖羣峯自環列君不見混
沌開闢分七金須彌坐斷滄溟心衲僧不解中山義

只管區區向外尋

大岳贈日本積首座

除却須彌山總小只消芥子都吞了與他拈起一微
塵富士嵯峨接蓬島中國岱衡華霍嵩寶刀削出青
芙蓉回光返照方寸裏積塊浮漚三界中捏不聚吹
不碎是何物在乾坤外臨崖望海海茫茫觸石起雲
雲隊隊

大心

摩訶兩字如何譯不落時人情與識上乘菩薩信無
疑中下之流豈能測古釋迦今彌勒是處分身千伯

億怛怛怛怛空費力爲人曲指何曾直饑食渴飲任
天真便是降魔轉法輪

無方

一拳打破虛空一脚踏翻大地東西南北不分上下
四維安寄大華藏界雲水寬伯千刹土秋毫端放開
捏聚總在我左拋右擲胡爲難旣非襍染與清淨畢
竟如何辨邪正直下全提摩竭令繁興永處那伽定

南隱

五十三人善知識善財無處尋踪跡文殊指示太分
明踏破草鞋空費力不住山林不住塵非凡非聖非
疎親衲僧了了見得徹大道茫茫沒却身謂之有離
窠曰謂之無塞寰區閭浮夜半日卓午只在目前何
不覩

實菴

棒打虛空鳴剝剝石人木人齊應諾十方惟一堅密
身鐵壁銀山難入作無形相亘古今不除妄想覓真
心牛頭自見四祖後百鳥啣花何處尋

笑雲

山中人笑雲來去幾度欲畱畱不住一片西兮一片
東爲誰掛在青松樹有時卷不論高低并近遠有時

舒南北西東滿太虛本自無心休問跡悠揚散漫隨
風力白衣蒼狗任縱橫返寂還空何處覓却恐山中
雲笑人區區未免走紅塵但能放下便安樂所以長
將雲喻身

少起

達磨面壁可祖安心二株嫩桂布影垂陰上撐天兮
下拄地往不古兮來非今自從隻履歸西域歲歲春
風添翠色莫道庭無立雪人一花五葉香何極

西源贈遠首座

阿耨達池分四河四河競注同其波不獨魚龍與蝦
蟬大身復有阿修羅天台遠也侍吾久出紙乞我西
源歌歌西源無滴水佛也祖也徹頭徹尾今兮古兮
透頂透底更說甚麼竺乾震旦南岳石頭馬大師龐
居士只因一口吸西江無限波濤從此起

一源

羣靈一源假名爲佛佛既假名源從何出釋迦老子
曾未悟四十九年曲流布誰言教外有別傳百萬人
天空罔措先聖道流泉是命湛寂是身從本不清不
濁卽今非古非新四大海收歸涓滴五須彌卷入微
塵徧界金波常市市與他凡聖無交涉

海屋

普門道人索我謬未免平地生風波屋爲海耶海爲
屋海屋之義當如何百千瀛渤從此起起亦不離涓
滴水沃日滔天也大奇卷舒只在軒窗裡我觀觀音
心海空一一佛屋羅其中接影連綉寶樓閣珠幢玉
樹光玲瓏及乎斂念元無有試問道人知此否不下
禪牀徧十方春風自裊金瓶柳

谷隱

龍以角聽蟻以身聽人聽在耳風鳴谷應聽到無聲
谷自空山河石壁遙相通直饒千手掩不得所以八
面俱玲瓏雖然隱也何曾隱白日青天雷轟輓

閒閒

終日怱怱那事無妨行住坐臥一絲不掛看經費眼
力作福受奔波饑來喫飯困來睡如此閑閑快活何
佛日普照慧辨楚石禪師語錄卷第十七

音切

巘魚偃切

壘徒含切

摩下素切

準何切

竦實證切

溢盆音

榜林直切

上苦旱切

叢許活切

陡當口切

菱古來切

崩隄力切

芳林直切

鎌力詹切

菅賈顏切

嘉興優婆塞張明廣男張科會勸衆信周允恭
 陸智旭 潘德本 朱文 平鶴 程浙 陸氏
 張瑞共施銀刻此
 楚石禪師語錄第十七卷 昆明沙彌真玄對
 真州王國英書 進賢萬子美刻
 萬曆庚寅秋五臺山妙德菴識

佛日普照慧辯楚石禪師語錄卷第十八

偈頌四

侍者文斌等編

明真頌二十八首

我有摩尼一顆埋在五蘊身田
 昨向泥中取出光明
 照燭無邊所爲莫不如意
 日用尋常現前世上誰無
 此寶昏迷未脫蓋纏
 灰生生死縈絆果報
 或人或天
 一旦逢善知識
 豈非有大因緣

右一

只這言語聲色非根非塵
 非識釋迦親見
 燧燈故號
 能仁寂默平治自家田地
 淨除瓦礫荆棘
 身光充徧

十虛豈止百千萬億一念成佛不疑多方轉化何極
雖云妙行莊嚴畢竟歸無所得

右一

觸目無非此道莫揀精麤大小眾生與佛何殊總是
自心所造修善天堂化生受用珍奇異寶地獄皆由
作惡鐵牀銅柱圍繞臨終罪業現前方恨悔之不早
覺悟煩惱菩提迷惑菩提煩惱

右二

禪師不假多知饑食渴飲隨時將心用心大錯在道
修道堪悲內外推尋不見中間亦絕毫釐眾生別求
智慧諸佛何異愚癡一等黃金作器瓶盤釵釧環兒
自體元無改變千般任用爐鎚

右四

貪嗔癡號三毒三毒起於一心本來空寂三毒三毒
自此平沈頓獲金剛正體親聞大覺圓音了然不生
不滅解者非古非今智士現前究竟愚人向外推尋
妄情造業難斷如象溺泥漸深

右五

觀心常坐習定便欲此生親證證得常住法身堪續
如來慧命若也沈空滯寂墮於二乘禪病澄潭不許
龍盤大象豈游兔徑隨處逍遙快樂洞明自己真性
可中不亂不定向上非凡非聖

右六

法離言語文字返着文字言語假使精進三藏何如
直截根源巡行數墨不悟轉讀令人轉昏心地本無

一物澄空迥絕塵痕胡爲自起障礙日夜隨他六根
一念空諸所有魔外窺覷無門

右七

昔有維摩大士示疾毗耶城裡三十二箇菩薩各談
不二玄旨文殊請問維摩維摩一默而已如今博地
凡夫未學音聲三昧剛把公案批判妄將賢聖訶毀
若非了悟自心般若妄談招罪

右八

末法比丘不讓多因忿怒鬪諍既依大戒出家須稟
六和爲尚羅漢深證無生未曾與人相抗善哉圓頂
方袍便是當來佛樣心內坦然平夷世間靡不歸仗
莫起一念嗔火赫赫燎原難向

右九

衆生業識茫茫心裏渾如沸湯只管隨聲逐色何由
返照回光參禪發明自性譬似遠客還鄉曠劫收歸
當念當念含攝十方觸境逢緣不變着衣喫飯如常
無明從此消滅契惱自然清涼

右十

不了第一義諦因茲名曰無明我觀無明無性無住
無滅無生菩薩雙亾理事聲聞怕怖色聲一居逍遙
樂土一在解脫深坑離却二邊中道洞然清淨光明
人間天上隨意廣度恒沙有情

右十一

靈空元自無像不用斷除妄想妄想卽是真心何須
分一作兩水消爲水溫和水結爲水巖冷濁惡衆生

可化清淨諸佛堪仰諸佛衆生本性豈同外物消長
金剛座上刹那永絕從前影響

右十二

法身不見邊表日用何曾欠少語默動靜施爲無心
自然合道但有絲毫罣礙便遭魔境纏繞大海普納
百川須彌合成四寶到頭難免無常徒自汪洋峻峭
一悟真空妙理涅槃生歿俱了

右十三

衆生本來自佛甘墮無明窠窟若悟無明本空輪迴
從此超出譬如一點明燈能破千年暗室決了貪嗔
體性空華陽燄非實直須立志參究不可隨情放逸
惟有禪門捷徑別無入道要術

右十四

佛口初無言說法身豈有生滅只因隨順世間便見
千差萬別細辨凡夫因果廣標諸聖旨訣玄門歷歷
開張教網重重施設末上拈花示衆盡除方便直截
譬如十斛驢乳散在一滴獅血

右十五

大有世間癡漢隨他聲色流轉不知萬境樅然總是
心靈所變墮在塵勞海中無由脫離魔網羊車卽是
牛車我面何殊佛面直下回頭便是不勞苦口相勸
一朝颺下皮囊免到閻公業案

右十六

小小如螢之火能燒大地叢林莫教一念嗔起滅盡
無邊道心佛祖令人保護防他境界來侵衆生與佛

9170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

何別葉却真如外尋流出蓋天蓋地本來非古非今
要知般若靈驗入海鐵舡不沈

右十七

覺道無過自悟參禪不要他求却來心外覓佛如向
沙中取油演若達多發笑也曾棄鏡尋頭白雲千里
萬里黃葉前秋後秋要了即今便了未休何日當休
拍手浩譎歸去倒騎露地白牛

右十八

古今得道賢聖當念無脩無證煩惱菩提兩亾涅槃
生歿俱淨境風飄鼓不動常處那伽正定應佛圓如
太虛臨機湛若明鏡堂堂世出世間在在法王法令
一切凡夫本同不離法界體性

右十九

愚夫背惡向善佛道轉求轉遠放下身心便休一時
善惡俱遣天堂快樂不思地獄煎熬亦免好箇天真
古佛十方法界克滿既無生滅去來寧有是非長短
性地自然坦平塵勞何用除斷

右二十

法王出現世間方便談空破有有者必歸於無是為
聖師子吼玉毫金相莊嚴前取涅槃非久天地至時
崩壞誰論貧富好醜可憐外道愚癡妄執梵天長壽
八萬大劫既終難免輪迴不受

右二十一

何處出離生歿幾人悟解真空真空非有形貌更問
南北西東瞥起纖毫妄念頭頭窒礙不通執之必落

邪道放之未免昏蒙身心直下透脫如鳥飄然出籠
無病何須服藥愚癡智慧雙融

右二十一

任你多般取捨如同水上浮漚漚生漚滅難止念去

念來不休努力要須猛省回光更莫他求一間空舍

無主傾壞何勞再修饑把鉢盂噉飯睡時塊石枕頭

十二時中快樂誰能似我無憂

右二十三

幻士化成大宅園林花果爭鮮其中羅列男女車馬

往來市纏取性歡呼鼓舞乘時放逸狂顛灰生骨骸

盈地婚嫁笙歌滿前愚者執為實有不知幻化使然

至竟都無一物雲開依舊青天

右二十四

法性本無造作且非內外中間聲色何須苦猷塵根

亦不相關斷除煩惱轉遠求證菩提即難有念便沈

生灰無為自契涅槃兩途俱是障礙中道又隔河山

打破鏡來相見身心索爾虛閑

右二十五

悟向迷中尋悟迷從悟裡發迷被他二法纏縛何日

解成菩提佛祖元無指示癡狂妄有思惟常情執著

不捨斷見由來自欺智者不求解脫一言可破羣疑

貪嗔即是大道背捨心王問誰

右二十六

燃燈授記釋迦於法了無所得我觀天上人間不見

當來彌勒濁惡眾生可怪目前覩佛不識何須轉腦

回頭便合騎聲蓋色盡未來時度生分身百千萬億
卽今揭示龍華一切人間罔測 右二十七

欲識自家寶藏六時常放光明本非青黃赤白不離
坐臥經行三世如來骨髓歷代祖師眼睛大似水中
月影還同色裡膠青灼然不可取捨畢竟難論壞成
在在逢緣利益塵塵救度迷情 右二十八

招提德嚴法師講首楞嚴經說偈一十八首寄
之

得道應須廣度生度生必使性心明闇浮提有梵天
咒捺洛迦無姪欲情慶喜出遭魔網縞文殊來護法

舟傾多聞未可爲奇特曠劫薰修在力行

外洎虛空內色身都盧不出此心眞浮漚未足窮瀛
渤棄指須當認月輪聽法緣心非本性掌亭實主豈
游人離聲與色無分別石上栽花井底塵

手開手合寶光飛左右回觀是阿誰須信此頭搖動
處不妨全體寂然時明心見性無舒卷認物隨流妄
覺知無上法王眞實語豈同虛假末伽梨

波斯匿性未嘗遷老見恒河似幼年莫景不須悲白
髮浮雲終是散青天來從曠古人何在去作荒丘骨
已捐劫火洞然無一物分明父母未生前

七處徵心心不有八還辨見見元無擘開祕密千重
鎖迸出圓明一顆珠從此聖凡知解絕有何生歿性
情拘話頭拈起知音少畱與人間作楷模
地水火風空見識徧周法界本來圓當知實義非言
說妄計因緣與自然起滅無從常住體麤浮不悟此
經詮衆生那箇不成佛與作當來得度緣
根塵識是如來藏於一毫端洞十方大地無時相助
發虛空有口自敷揚眾生不守真如性諸佛皆居常
寂光生滅去來何所礙鳥飛不盡碧天長
覺明明覺異還同畢竟山河大地空演若多心狂自

歇摩登伽女呪難籠直教根本無明斷便與如來妙
理通三世有爲皆有滅十虛無始定無終

一六義生圓湛中一亾盡使六銷鎔脫粘內伏心非
有勞發前塵性本空自在浮沈魚出網無妨去住鶴
離籠根根互用如何說正與花巾解結同

良哉二十五圓通各各熏脩不滯空證入法門雖有
異悟明心地本來同思惟妙德言尤審選擇觀音耳
最聰堤畔綠楊新過雨數聲黃鳥囀春風

斷姪除殺又離偷成佛難將妄語求此四律儀持不
染彼諸魔事及無由道場旣立心身淨神呪弘宣刹

海月無量金剛來護法願將杵破惡魔頭
八萬四千顛倒想想爲十二類生因妙明覺性如開
悟虛妄浮心卽本真龍鬼天仙紅肉髻羽毛鱗甲紫
金身誰能靜坐思量看內外中間絕點塵
三界衆生依食住永除酒肉斷姪心相生相殺旣無
業外境外魔終不侵刻骨銘肌持淨戒隨方觀佛奉
玄音瑠璃中更懸明月一片光華耀古今
智慧初明欲習乾位從四十四心安信初口道純真
性灌頂如王付國看利行度生心愈曠回真向俗道
何寬欲登十地須加行行覺重重複又單

吾聞地獄元非有十習纔成六報來惡念轉教爲佛
福刀山喝使作金臺不貪天上歡娛事肯受人間愛
慾胎本性彌陀常顯現蓮花一朵待時開
十類元從十鬼分命終報盡復爲人十仙徒此短長
壽三界不離生歿身色究竟天居有頂大阿羅漢出
凡塵窟空大道無歸處未免從頭再入輪
旋消五陰十禪那十五重重破惡魔明目不愁罽暗
隔堅水爭奈沸湯何自心了悟非登聖如水平流豈
異波直至菩提無少乏大家稱贊阿難陀

五陰出來體是虛五重妄想待消除不離本覺妙明

性要識根元生起初多劫受熏嗟莫算六根互用滅
無餘盈空寶施微塵佛若比弘經福不如

示諸禪人九首

四七二三何所傳分明佛祖是生冤拈來的的無多
子點破區區在一言猶自將心求悟解不須特地覓
根源晝明夜暗尋常事屋角風鈴語更繁
都緣昧却自家心只管茫茫向外尋不識綵雞呼作
鳳還將黃葉認爲金求師跋涉山川遠逐境因循歲
月深有問却須向伊道誰家屋裡沒觀音
而今謾說普通年此話無人舉得全臨濟何曾見黃

檠趙州亦不到南泉追風木馬來如電入海泥牛去
似煙船在須彌山上泊一篙撐破水中天

立處孤危用處親不知蹉過那邊人宗師未免拋機
境學者須令辨主賓契喝嗔拳同閃電普天而地盡
揚塵果能著著超方外十影神駒五色麟

喃喃唱道固非真默默酬機也未親却是山河大地
說徒勞文字語言陳敲牀豎拂休稱妙簇錦攢花枉
鬪新可信吾宗無此事分明不認本來人

樹凋葉落正斯時體露金風幾箇知未入玄門難下
口從來大悟不存師炊巾謾爲叅方展掣電猶嫌佇

思遲五十三人爐鞴鑄成一箇善財兒
不除妄想不除真也是朱砂畫月輪脫體承當能幾
箇將心湊泊有多人寒山直忘來時道布袋橫拖滿
眼塵世出世間常快活從他物我競踈親
瑞巖自喚主人公口與心違道不同千里持來須粉
碎滿盤托出盡虛空隨聲逐色龜投網得意忘言鶴
脫籠何必升堂求指示現前無法不圓通
日用分明問阿誰談玄說妙謾多知新新固是無停
識念念何曾有住時若遣衆生修定慧還令諸佛起
愚癡五雙十箇難吞透自作金圈與栗皮

閱藏諸僧求偈六首

以字不成八字非普天而地解人稀生獍師子纔開口
忿怒那吒頓失威三竅圓珠言下得十方法界目前
歸如來禪許師兄會還我宗門向上機
教外別傳傳底事言前便領領何遲纔求妙悟心昏
昧未透玄關眼搭睡佛字道來須漱口禪牀掀倒不
容師偏圓半滿何須舉盡是空拳誑小兒
案頭故紙已多年中有摩尼曜大千了了示人人不
會明明標旨旨難宣牛欄馬廐如何說海藏龍宮作
麼詮一句包容無量義閻浮樹在海南邊

禪述
梵石齋金卷一
十二
覓心不得使心安因甚禪流入作難往古來今多少
樣改頭換面百千般須教兔子離窠窟更逼鮎魚上
竹竿自己靈臺如未悟藏經只爲別人看
拈來更問是何經寶藏玲瓏夜不扇露柱伸眉萬象
說須彌合掌大虛聽雲門特地擯拄杖百丈無端指
淨瓶頂上撥開二隻眼知君猶自大惺惺
心是光明妙法幢照今照古信非雙公塔凍蟻空尋
穴撲紙癡蠅未透窻達磨大師輟轆鑽釋迦老子葛
藤椿尋常只麼閑閑地可使波旬外道降

送僧住菴九首

住菴門戶潑天開且豎拳頭接往來方便許人呈漆
器等閑垂釣得黃能是窻是壁心心現非聖非凡法
法該佛祖位中畱不得從教金殿鎖蒼苔
大隋燕坐木菴時問答何曾巧設施拄杖挑蛇付猛
火草鞋信手蓋烏龜無論正定兼邪定盡使深疑頓
絕疑東土西天無佛祖說禪不動口唇皮
滿屋黃金眼不開山居豈是大癡呆鉢中飯少枯堪
喫身上衣單紙可裁日出道人鋸地去夜深童子點
燈來須知佛法無高下悟了方堪養聖胎
白雲深護碧巖幽成現生涯免外求一箇衲衣聊掛

體玉間茅屋且遮頭長松片石閑無事淡飯麤茶飽
卽休拈出白溪長柄杓不風流處也風流

昔人久矣住巖阿撞着燒菴施主婆十字街頭無向
背孤峯頂上却諍訛侵晨自拾枯柴去向晚還衝猛
虎過妙用神通只這是來人未免問如何

走徧禪林却住庵臨行別我語喃喃揮毫寫偈寧非
錯杜口吞聲轉不堪萬法空來知有幾十成蹉過問
前三古人爲佛垂慈切不厭城隍入關蓋

四祖當年訪懶融牛頭山下忽相逢一言見性方成
道百鳥銜花便絕踪不怕菸菟號永夜長煨槽櫛過

深冬流泉疊嶂分明語要引禪流達此宗

青山影裡鑿頭邊爲法求人也可憐打地初非閑打
地磨磚却是亂磨磚直教桶底和墻脫要把繩頭纂
鼻牽分付滅胡真種草大家明取未生前

穿雲渡水又何疑轉腦回頭更是誰粟米粒中攤世
界藕絲竅裡挂須彌把茅不換千間屋一飽能忘萬
劫饑若問住山何境界人人鼻孔大頭垂

示華嚴會諸友八首

正覺山前大雪中明星夜照普天紅慈尊正眼旣打
失覺從頭談脫空要與古今爲榜樣直教凡聖絕

羅籠依然廣大門庭在豈假潛鞭密煉功

大千經卷在微塵剖出還他過量人無始眾生盡成佛本來大果不離因漚生漚滅重重海花落花開樹樹春可信入荒田不揀橫拈倒用總奇珍

開題七字甚分明早隔西天十萬程未展霞條先領會何勞玉軸更施呈花枝朶朶分紅白溪水條條間濁清觸目無非真法界都收有識與無情

騎聲蓋色大毗盧可惜男兒不丈夫枉去藍田尋美玉誰知布袋裹真珠口頭豈假多言說經裡元來一字無拋却殘羹與餽飯趙州東壁掛葫蘆

於刹那時覺道成了無一法可畱情十方法界從心現大地山河似掌平鐵樹枝頭紅果熟泥牛領下白毛生分明指出通天路南北西東自在行

知識門庭五十三一針鋒上悉包含心能契理無難事脚不沾塵是徧叅谷口黃鶯聲啞啞簷頭紫燕語呢喃玄門畢竟如何入向道西川出漏籃

彌勒殷勤慰善財一聲彈指閣門開身心俱向此時捨境界却從何處來皎皎青天飛霹靂茫茫白晝靄塵埃看他無手人揮袂石上蓮花取性栽

文字雖多義一般衆生骨髓佛心肝何勞經卷開時

讀但就香煙起處看俊鶻常思空外翥癡蠅只向紙
中鑽直饒講得天花墜不達斯宗盡自謾

送僧入蜀四首

西川五十四軍州滿目風光爛不收一笠一包行脚
去好山好水任君游昔年大士居昭覺今日何人接
勝流道路八千如咫尺還同自己屋簷頭

去去峨眉禮普賢莫教錯認妬羅綿華嚴會上咨叅
狂妙德空中主伴圓側耳但聞菩薩現回身仍見象
王旋區區不用從他覓密意分明在汝邊

此行須到大隋家照顧漣中鼈鼻蛇十箇五雙俱蹉

過一千七百謾周遮悟來大地山河窄迷去他鄉道
路賒纔有纖毫須刻却免教人道摘楊花

嘉州大像接青雲猶是如來小小身正體處空包不
盡衆生肉眼見何因有緣處處逢彌勒無語琅琅轉
法輪合掌低頭三拜起方知全假卽全真

送僧之廬山

簡寂觀中甜苦笋歸宗寺裡淡醎齏廬山面目分明
露衲子身心特地迷秋到樹頭黃葉落夜深峯頂白
猿啼叅禪若也求玄妙十萬流沙更在西

寄雙林東溟

門樵拍板付禪翁衣鉢長留觀史宮檣樹兩株爲佛
事竹篔三尺展神通泥牛嶺上吞黃犢石虎山前咬
大蟲我有家書無處寄金刀剪破太虛空

寄聖壽千巖

伏龍山上石頭陀轉覺無明業識多堪笑古人施棒
喝却成平地起干戈傳來一道聰明呪寫出平生快
活歌謝事尋常懶開口聽他石曰念摩訶

悼焦山道元

我在錢塘住兩年幾回同買過湖船張家寺裡春方
半楊子江頭月屢圓只望先師公案了皆稱寂照子

孫賢誰知轉眼成千古淚灑伽陀唱和篇

悼江心石室

幾年石室老師兄今日胡爲喚不磨八萬塵勞空蕩
蕩三千刹海冷澄澄摧殘世上無根樹撲滅人間不
夜燈末後光明難蓋覆紅爐猛火結寒氷

賀徑山永首座

摩訶衍法若爲宣五髻崢嶸高插天一喝虛空成粉
碎重提佛祖舊因緣分明劍向眉間掛豈待瓢從地
上旋彈壓滿堂龍象衆方知法社有英賢

示僧四首

不是風兮不是幡祖師一擊破重關自心又把心來
認無手重將手去扳金屑徒勞增腎膜劍峯直下斬
癡頑可憐滯句承言者也道尋常語默間

不是幡兮不是風癡人特地受羅籠張良謾立安邦
計李靖休誇斫陣功十影神駒猶礙道九苞祥鳳不
離空如今要識曹溪旨舉足西行却向東

一切衆生有佛性如何狗子獨言無趙州善用吹毛
劍衲子全拋待兔株門外雪深人跡少渡頭風緊浪
花麤富陽若更求玄解笑倒西天碧眼胡

一切衆生無佛性髑髏箇箇有龍吟東平解撲馮山
鏡龐老曾彈馬祖琴曠劫本來無背面古人真箇好
知音癡兒也道忘言路平地翻爲荆棘林

答浮慈和尚韻送彛藏主三首

一氣轉一大藏教却來北斗裏藏身撥開猛烈紅爐
焰拈出清涼白月輪靚面相呈全體露到頭不出此
心真宗師有語皆超卓多少拈髓舐指人

一氣轉一大藏教塵毛刹海現全身洞明自性無生
理能轉如來正法輪三句劈開玄與要兩頭坐斷僞
和真狂機大似藍田石誤殺彎弓射虎人

一氣轉一大藏教金毛獅子解翻身聖凡頓現高臺

鏡魔外橫飛契鐵輪纜涉語言皆是矣但隨聲色便
乖真如今却憶長汀老十字街頭等箇人

宗鏡錄華嚴十種無礙成十偈示僧

一理事無礙

真性皆同刹相殊廓然清淨大毗盧香披齒齒千重
葉影現摩尼五色珠法界森羅元不有宗乘舉唱亦
非無憑君更莫論心境荆棘從來是坦途

二成壞無礙

空中佛國壞還成水面漚花滅又生體用何須論彼
此根塵不必較虧盈三千刹土隨心變二八蟾光逐

候明古往今來手翻覆黃河知是幾回清

三廣狹無礙

廣狹須知不滯形聖凡迷悟在心靈諸般水入方圓
器一等空隨大小瓶菩薩天人依法界修羅蚊蚋飲
滄溟自來平等真如體就急移寬也只寧

四一多無礙

十虛捏聚一毫頭百億毫頭刹海周習習和風薰草
木茫茫大海攝川流綵絲直把明珠貫金像都將寶
鏡收細看目前相入處盡歸方寸莫他求

五相卽無礙

萬法圓成一念中衆生世界盡牢籠光明大小珠相
似赤白青黃色不同畢竟未知何處起如今方信本
來空平常一句如何會日出西方夜落東

六微細無礙

曲折皆能一一隨窮幽極渺固委移纖毫蜜滴蜂吞
處九曲珠穿蟻度時芥子孔中藏大海藕絲竅裏着
須彌燎原起自如螢火智者猶因取喻知

七隱顯無礙

千差萬別任縱然不落高低染淨邊聖處卽凡凡卽
聖圓時能缺缺時圓節文竝似初生笋因果渾如未
剖蓮但屬自心非外境陰晴同是本來天

八重現無礙

一塵一刹一如來刹刹塵塵靡不該帝釋殿前珠作
網梵王宮裏鏡臨臺風休巨浸星辰入日照芳池菌
萐開包裹虛空只這是靈明廓徹信竒哉

九主伴無礙

大華藏海舍那身眷屬莊嚴處處真列宿光明瞻玉
兔諸王富貴屬金輪江河浪動無非水草木花開總
是春一念十波羅蜜滿此中誰我復誰人

十三世無礙

水中葫蘆捺得沈非來非去亦非今空花亂落隨流水石笋新抽出遠林休把此言論妙道待將何物比真心永明老子輕饒舌輸我西窻茗椀深

澄靈散聖山居偈如寶藏主求和

因僧問我西來意我話山居是幾年佛祖位中休着脚凡愚社裏且隨肩三間屋子藏山塢萬樹松花照石泉曠大劫來無改變阿難依舊世尊前

寄天童孚中和尚

長庚峯頂白雲間捧劄西來笑展顏幾疊巖巒圍丈室萬株松樹繞禪關當年金碧誰將去今日天龍合

送還老我恰如窺豹者管中時復見斑斑

寄大慈晦谷和尚

靈巖又復轉花巖數到慈雲恰好三我望鄉關千里隔君將佛法一肩擔金毛踞地誰能近玉塵生風不倦談握手未知何處是晚天涼月出東南佛日普照慧辯楚石禪師語錄卷第十八

音切

縱千容切 籍古法切 擘補華切 眠赤之切 鮎乃謙切 能奴臺切 音

菴於去切 菟徒音切 咤知加切 袂彌鏡切 翥之虜切 檣徒力切 磨

於於蒸切 苞博交切 飽丁回切 舐神爾切

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

釋

卷不詳

二五

嘉興優婆塞張明廣男張科會勸衆信范應元
俞成民張知道沈昭陶化顧僕金鑿
謝觀共施銀刻此
楚石禪師語錄第十八卷 昆明沙彌真玄對
真州王國英書 上元許一科刻
萬曆庚寅秋五臺山妙德菴識

佛日普照慧辯楚石禪師語錄卷第十九

偈頌五

侍者文斌等編

四料揀

奪人不奪境三竿曉日千門靜
桃花樹樹近前池不見
佳人來照影

奪境不奪人玉鞭金鐙賞殘春
千紅萬紫歸何處
驚地風來卷作塵

人境兩俱奪漠漠長蛇圍偃月
誰敢當頭犯太阿
直教萬里人蹤絕

一伎師

卷不詳

人境俱不奪上下四維春似潑聖主垂衣日月明將
軍放馬乾坤濶

總頌

一具枯骨成牙齒兩片薄皮爲耳朵昨夜三更失却
半天明起來失却火

四賓主

賓中賓魚目將爲無價珍瞎眼波斯來打合一般病
痛一般貧

賓中主東西不辨喃喃語手中杖子不曾離錯認燈
籠爲露柱

主中賓德不孤兮必有隣玉殿瓊樓無草蓋不知誰
是帝鄉人

主中主大用現前沒規矩金毛獅子一滴血迸散驢
兒十斛乳

總頌

何門不向此門歸萬煅爐中鐵疾槩不是山僧多指
注大家惜取兩莖眉

四喝

一喝如金剛寶劍劈面揮時難禪閃不論佛祖與天
魔纔有纖毫須痛斬

一喝如踞地師子古塚野狐逢卽成若是金毛師子
兒展開四足搖雙耳

一喝如探竿影草可中誰了誰不了碧眼胡兒舉鐵
鞭玉門關透長安道

一喝不作一喝用十月黃河連底凍小小狐兒掉尾
行這回不要虛驚恐

三玄三要

第一玄釋迦彌勒有何傳人間天上來還去古井茫
茫把雪填

第二玄未曾開口在言前電光石火親提得鼻孔依

然被我穿

第三玄胡孫上樹尾連顛只因掣斷黃金鎖便把心

肝樹上懸

第一要了無奇特并玄妙未曾噉飯肚皮空久不喫

茶唇舌燥

第二要門外讀書人來報烏有先生作狀元子虛聽

得呵呵笑

第三要只爲慈悲成落草非我非渠也大奇螻蛄眼

裏山河繞

首山綱宗偈

郎君拙非拙體瑩如冰雪背挽兔角弓射落天邊月
女兒巧非巧一老一不老騎却水牯牛莫教入荒草

汾陽三訣

第一訣佛祖曾超越莫話未生前休論心路絕

第二訣動靜誰甄別龜毛扇子扇泥牛一點血

第三訣江南并兩浙春和萬樹花冬冷千巖雪

十智同真

甚人同得入俊鷄趁不及打破鳳林關穿靴水上立
與誰同音吼面南看北斗猴愁樓搜頭狗走抖撒口
作麼同生殺向上一路滑潘閬倒騎驢梵志翻著襪

甚人同得失判官手裡筆冷水浸冬瓜大家厮混淆
那箇同具足如賊入空屋拾得麗水金却是藍田玉
什麼同徧普蟪螟吞却虎船子下揚州大地無寸土
何人同真智無是無不是雪峯會鞦韆毬俱胝亦豎指
孰與總同叅特地口喃喃苦瓠連根苦甜瓜徹蒂甜
那箇同大事山形拄杖子北人不相鼻南人不相耳
何物同一質三九二十七年年是好日日是好日

黃龍三關

我手何似佛手兩兩三三九九李公醉倒街頭元是

張公喫酒

我脚何似驢脚這裏踏他不着合眼跳過黃河徧界
紅輪輝赫

人人有箇生緣不知誰後誰先趙州八十行脚謝郎
只在漁船

寄高麗檜巖至無極長老

當年自說游高麗近日人傳住檜巖會下不知多少
衆前三三與後三三

五冠山上看飛瀑下有寒潭萬丈深見說神龍降已
久全身入鉢大如鉢

眞身舍利無方所東國西天共一家不見彥陽通度

寺神光長繞佛袈裟

聞道江陵有五臺放光石寄一枝來文殊大士分明
現莫道迷雲掃不開

鳴沙灘上試揚鞭無數琵琶自動絃一色玫瑰三百
里渾將錦繡裹山川

金剛一萬二千峯遠近高低各不同那箇峯頭堪着
我他年縛屋隱其中

千重暗室萬年冰喚作瑠璃是假名不隔弟兄相見
眼扶桑夜半日輪明

和梁山十牛頌

尋牛

天涯海角徧參尋直入萬重煙嶂深拚得今朝與明日綠楊隄畔聽鷓鴣吟

見跡

東西南北路頭多踏踏遺蹤可是麼仔細看來無兩箇便從今去莫疑他

見牛

隔牆認角又聞聲雨過前村草正青一對眼睛烏律律通身毛色畫難成

得牛

遼天鼻孔要穿渠直待金繩爛始除向去不須分皂白和泥合水且同居

牧牛

從來一箇不羈身滿眼雲山滿眼塵今日稍能知觸淨肯緣苗稼犯他人

騎牛歸家

前坡只尺是儂家疊疊春山橫暮霞好箇歸來時節子一鈎新月掛簷牙

亾牛存人

千重雲樹萬重山倒臥橫眠任我閑此景畫圖收不

得誰言身在畫圖間

人牛俱亡

返身踏破太虛空一處纔通處處通
而地普天無影跡不知誰解立五宗

返本還源

一一根門自有功聞聲見色不盲聾
晨昏總是尋常事睡起三竿海日紅

入鄆垂手

珍御全拋與麼來分明烏背與魚腮
燠天鑑地能奇特盡使勞生眼豁開

十二時頌

子時大地黑漫漫不待重將正眼觀
枕子忽然拋落地須彌崩倒海枯乾

丑時遠近盡鷄鳴萬想千思睡不成
身在世間間不得又穿衣服下堦行

寅時那箇是閒人貴賤賢愚總為身
只管嚏眠呼不起奴兒婢子也生嗔

卯時漸見日輪高已向堦前走幾遭
鼻孔眼睛忪似鑽千般不顧是眉毛

辰時未免去烹煎火澀柴生滿竈煙
四隻鉢盂三隻

破一雙匙筋不完全

已時作務也奇哉門戶支持客往來對坐喫茶相送出虛空張口笑哈哈

午時赤日正當中五色摩尼耀太空撲碎都來無一物依然赤白與青紅

未時樹影過窻西靚面相呈剗地迷從曠劫來無間斷今朝何事隔雲泥

申時一日幾光陰早被桑榆暮景侵抖擻精神休瞌睡啾啾鳥雀滿園林

酉時紅日下西山草屋柴門及早關幾箇老烏松頂

泊清晨飛去夜方還

戌時無事莫開門靜臥寥寥四壁昏自有光明看不見見時生歎不能吞

亥時洗脚上牀眠生在閻浮大可憐眠不多時天又曉未知休歇是何年

送玃上人禮祖

珠不曾穿玉不磨渾崙句子絕誦訛江西特地尋靈骨却是無風而雨波

送道場馨維那

堂裏宣揚十號時陳如尊者亦開眉轉身問訊出堂

去不覺踏翻瑤席池

送立禪人還七閩

玄沙不度飛鳶嶺百億山河拄杖頭子若歸鄉須驗
看秤錘到井忽然浮

送遂藏主歸靈隱

從來佛祖碎玄關萬論千經下口難未動舌頭俱吐
露白蓮峯月照人寒

送賢禪人

聖賢有甚麼奇特鼻孔元來搭上唇若起一毫增損
見當知不是箇中人

送英禪人

英靈衲子久無聞一句當陽玉石分不把草鞋輕晒
却吳山紅樹越山雲

送玄侍者

學道叅玄俊衲僧千山萬水一枝藤始終不墮人窠
曰他日方堪繼祖燈

送虎丘定藏主

睡虎元來是大虫翻身跳出草窠中是凡是聖俱吞
却方見楊岐正脈通

送玉泉昌侍者

布視赫赤紙衣鮮不寫文姝與普賢抖擻更無塵一
點肯將淨解汚心田

送虎丘順侍者

白雲飛落劍池傍紙襖新糊玉一方塔影忽然顛倒
卓爲渠懸筆寫提綱

送問禪行者

鳳凰山下劄一寨寨旗斬將罕逢人饒伊出得長蛇
陣頂罩燒鍾一萬斤

送徑山志書記

山上鯉魚生一角忽然踣跳上青天俱胝道者無尋

處却把龍王鼻孔穿

送容禪人

未別便行多少好須將白紙問人求鳳山未有工夫
答且聽松風舉話頭

送昌禪人

一片寒雲海上橫道人正泛鐵舡行夜深珠向龍宮
出無限光明動地生

送興禪人之天台

秋風剪剪葉飄飄去向天台度石橋一踏便須成兩
截普通年事在今朝

謝人送炭

晚來燒起滿爐紅
潦倒無能一病翁
因憶古人生意
在正當臘月有春風

夜坐

地爐兀坐燒殘葉
童子酣眠喚不膺
空盡大千無佛
祖老蟲翻下夜龕燈

送一禪人

出叢林又入叢林
渡水穿雲路轉深
誰謂他鄉元不
隔草鞋步步踏黃金

送日禪人遊南岳

南岳岩巒插太虛
道人獨往果何如
老猿啼在雲深
處露滴松梢月上初

送明禪人遊天台

五百聲聞不住山
何拘天上與人間
只消一盞黃茶
水供罷依然舊路還

送質禪人遊南岳

古路迢迢往復回
白雲終日冷成堆
半千尊者無尋
處石上幽花帶露開

送空禪人之姑蘇

洞庭一望水漫漫
去路遙隨眼界寬
紅蓼白蘋秋正

好不知誰把釣魚竿

翫月

兔有形兮桂有枝何如光影未生時古今翫月人無
數獨許南泉王老師

送清禪人叅方

雪盡莎根轉舊青幽房宿火響空瓶吳山越岫知多
少那取工夫到祖庭

聞子規

啼來啼去一聲聲却笑離人不解聽何處故鄉歸未
得白雲空鎖亂山青

送已禪人

露濕長松曉未乾殷勤送別下層巒前途有問山居
事但道冬來十月寒

因僧請益五祖演和尚語示之

滿城開盡牡丹花未免逢人撒土沙拈起庭前柏樹
子趙州門戶隔天涯

寄憲使士敬王公

綉衣直指向東南百郡趨風盡聳瞻長羨昔年裴相
國解從黃檗句中叅

此事當機覲面提休將祖意問東西相公判筆丘山

重誰謂昇天別有梯

贈南岳山禪人

舊結茅菴岳頂居年深且與世人疎曾坐一釣千峯
上得箇黃鱗綠尾魚

寄同叅

試把虛空打一量虛空只抵一絲長一絲摘斷重量
看赤脚波斯走大唐

祖師畱下一隻履東土西天誰往來拋向洞庭湖裏
了却教滄海起塵埃

漁者

釣魚船上謝三郎只在蘆花深處藏高枕綠蓑歌一

曲不知蓬背有嚴霜

因雪示衆

長空片片雪花飛眼底青山見亦稀最是禪庭消未
得五雙十箇不知歸

道童叅政見訪

隼旄光裏昔曾培人我山高喝使摧記得省堂重會
面禾城又是第三回

祖意明明百草頭長江自古向東流須知此物非他
物坐臥經行免外求

撰述

天石齋卷九

九

支那

西行雜錄卷九

十三

寒夜寄友

欲問平安半字無
天寒夜冷坐圍爐
因思熊耳峯前
客謾有青青桂
兩株

用韻答國清夢堂和尚

從來眼不見鼻孔
東土西乾無祖師
八十老僧頭雪
白蒲團禪板且
隨時
天人日日雨旻
陔怪爾空生默
坐何無夢老禪
憎愛
盡新豐曲和莫
徭歌

答東山楚材和尚

我昔與君叅徑
塢罕逢弟子過
於師一千七百
浩浩

地翻憶大平無事時

鉢盂倒覆四天下
拄杖橫吞諸佛師
不用靴頭此子
力放開捏聚總
臨時

答妙菴玄首座

飲光不得阿難
隨續燄聯芳
奈老何千里同
風一句
子漁人舞棹野
人謔

好與法燈三十
棒却將公案謗
先師幸然寂照
無傳
授誰記拈槌豎
拂時

答瓊西堂

同叅寄我妙伽
陔不問如何與
若何白雪陽春
無此

曲一回擊節一回歌

題船子夾山圖

劈口一橈天在水離鈞三寸水連天夾山不解抽身
退尚待華亭覆却舡

洞山云直道本來無一物亦未合得他衣鉢頌

云

主人手裏秤高低買賣商量總不齊直是無人酬價
數黃金白璧賤如泥

有僧下九十六轉語末後云設使將來他亦不

受頌云

一路通時路路通誰分南北與西東春風不管鄉談
別到處莠花似舊紅

送傳禪人

傳到無傳是正傳千鈞大法一絲懸當人不費纖毫
力烜赫靈光滿目前

送舜禪人

參見諸方尊宿來草鞋不枉踏塵埃深村古院無奇
特慚愧高人到一回

送瓊禪人之天台

百煉爐中鑄鐵牛一莖草上現瓊樓豐干拍手寒山

笑誰似渠儂得自由

送因禪人之江西禮祖

百億須彌鞋袋裏無邊刹土鉢囊中叅方若具叅方
眼列祖齊教拜下風

送圓禪人

九夏功圓正此時鉢囊花綻一枝枝東西南北從君
去頂後神光幾箇知

送敬禪人叅方

九到洞山雙眼碧二登投子兩眉橫家家門外通霄
路莫向古人行處行

送初禪人禮五臺

百城初友是文殊行脚叅方信不虛休問清涼山遠
近有緣處處得逢渠

送德禪人之南岳

拈來拄杖化爲龍吞却乾坤不見蹤有問又須向伊
道萬年松在祝融峯

送福知客之江西

誰是主人誰是客人門一着已先知馬駒踏殺人無
數只有歸宗眼似眉

送省侍者省母

空花要覓生時蒂陽艷須尋起處波不是出家恩愛
重夢魂偏在故鄉多

送安禪人往叅天童

誰道葫蘆醋不酸衲僧帶眼若爲謾長松一望二十
里脚未跨門先膽寒

送先禪人用蔣山韻

曾在獨龍岡上住寶公刀尺合將來將來呈似山僧
看何故囊藏不肯開

送勤禪人禮白塔梅檀像五臺文殊

紫梅檀把黃金裹喚作如來丈六軀端的要知真與

安五臺山頂問文殊

送人禮寶陀十首

大士分明立險關黑風裏面浪中間拚身入得翻身
出潮到沙頭日上山

重重綠樹坐肩髮片片紅霞覆足裙合掌向前稱不
審大千沙界一時聞

海潑爛銀千萬里山堆濃綠兩三重要知大士深相
爲聽取朝朝暮暮鍾

恒沙菩薩盡同名唱出一聲千萬聲禿却舌頭啞却
口青山盡處白雲橫

有一觀音在面門舒光烜赫照乾坤曉風吹上盤陀
石東望扶桑特地昏

觀音頂上戴彌陀心法何曾猷琢磨莫道聖凡相去
遠須知大海本同波

萬種千般在一心寶陀巖上覓觀音直饒見得分明
了依舊雲遮紫竹林

上人發足往南方大士眉間已放光記取重重相爲
處海濤推日上扶桑

五更日上金鎔海萬里朝來雪滾沙一念信心知是
妄普門曾不隔天涯

補陀巖是石頭堆日夜潮聲到兩回莫道觀音不曾
現山高海濶賺人來

竺二堂

西土大仙門戶別古今能有幾人登黃頭碧眼藩籬
外入室輸他俊衲僧

鐵壁

千尋峭石勢崔嵬總是純剛打就來碧眼胡僧覷不
破春風日日綉蒼苔

友巖

最難知是結交心鐵壁銀山百萬尋生歿兩岐俱識



破石頭大小盡黃金

寶山

空手入來空手去黃金堆塚玉玲瓏等閑提起一根
草萬劫千生用不窮

無住

機輪轉轉見應難盤走珠兮珠走盤猶怪盤珠有痕
跡暮雲飛盡碧空寒

汝海

楚王城畔水東流未入滄溟不肯休到了何曾分爾
我一般波浪拍天浮

流出曾襟蓋天地小爲一滴大無邊明知不是他家
事只者波濤漲百川

太虛

內外空空無一物山河大地盡包藏踏翻有海塵勞
息打破乾城劫數長

元菴

三間茅屋從來住百鳥銜花幾度春戶底門頭雖換
了依然不改舊時人

大經

釋迦老子口門窄般若華嚴小脫空將謂涅槃包得

盡摩訶兩字未開封

大愚

用巧人多用拙稀
心如木石太無知
就中自有分明處
懵懂元來不是癡

無盡

祖祖相傳只這是
佛佛授手亦如斯
海波乾又須彌碎
不見虛空有爛時

定山

屹然常在白雲中
不比飛來小小峯
幾度毗嵐翻海岳
何曾動着一株松

竹所

香巖一擊便忘知
大地平沈正此時
打雨敲風千萬箇
青青總是歲寒枝

春泉

東風浩浩水潺潺
不隔千山與萬山
識得根源何處起
任流花片落人間

梅叟

看到南枝又北枝
從教兩鬢白如絲
幻華滅盡留眞實
正是青青著子時

無旨

世尊何法可敷揚迦葉從來不覆藏且自栽田博飯
喫說禪浩浩任諸方

蓬隱

圓嶠方壺深更深白雲一色蓋瓊林從來不與時人
隔却笑人來海上尋

道林

本因言語顯無言不住中間與兩邊荆棘梅檀俱剗
却免教枝葉惹風煙

無得

石女腰邊裁兔角鐵牛背上刮龜毛草菴忽卸瑠璃

瓦古井蓬塵十丈高

道山

無心尚隔一重關險峻方知到頂難試問六年成底
事東雲深鎖雪漫漫

竺隱

五天居處絕埃塵只見青天不見人畢竟藏身沒蹤
跡沒蹤跡處莫藏身

正宗

掀翻海岳振乾坤南北東西此道尊臨濟德山無棒
喝不知將底付兒孫

大網

四海都將一網收不須重下釣鼈鉤看他衆目分張
處無限魚龍在裏頭

翠庭

歲寒常愛色青青曾是神光立到明階下任堆三尺
雪祖師門戶未常局

劍關

一握吹毛凜似霜揮來那箇敢當場與君放出其中
主百萬魔軍總被降

大千

百億須彌方捏碎恒沙世界又搏成藕絲竅裏挨紅
日一片山河似掌平

靈仲

虛明一點從何起只在尋常日用中畢竟難謾破竈
墮但將泥瓦合虛空

別峯

峭巍巍地插天青峻壁懸崖有路登莫謂此中山勢
險前頭更有最高層

象外

有形有相落凡塵無相無形未是真不在範圍天地

撰述

魏石齋卷十

三十一

內數聲清磬一閑人

無邪

偏中正與正中偏仔細推來着兩邊和這二邊都掃却一輪明月掛中天

一初

纔舉此心成第二寂然不動也非親須知佛法無多子坐斷乾坤日見真

實菴

拈却虛頭一着子入門不要問西東單單只把空拳豎大坐當軒振祖風

天然

昔日丹霞騎聖僧馬師方便爲安名人人具足如斯體不是因緣造作成

鏡堂

鑄出元非百鍊銅照時方信本來空白銀爲壁黃金瓦試問何人住此中

復初

返本還源一句子恰如混沌未分開明明數一爲千萬千萬重歸一上來

佛日普照慧辯楚石禪師語錄卷第十九

音切

鐙

多鄧切

鞞

丁可切

閃

式斂切

閻

芦宕切

拚

皮援切

哈

訶臺切

剗

楚簡切

寨

柴犬切

拳

居件切

磨

於陵切

隼

息晉切

旗

以諸切

烜

丁達切

徒階切

賺

徒階切

塚

徒果切

轆

力木切

屹

魚乞切

嘉興陳氏 沈氏 楊氏 濮氏 陶氏共施刻
楚石禪師語錄第十九卷 昆明沙彌真玄對
真州王國英書 深水端繼慧刻
寓曆庚寅秋五臺山妙德菴識

天然

佛日普照慧辯楚石禪師語錄卷第二十

襍著

利水陸陞座及行狀塔銘

侍者中端正叅等編

入上人血書華嚴經跋

夫常住真心舉一塵而塵塵頓現難思妙德修一行而行行全彰喻眾色之依空若干波之巾海始從信地無位不周終至覺場本體何別然眾生迷於妄念不知卽妄以明真諸佛照於圓宗所以唱玄而設教事非報化之末跡理絕凡聖之常談今古熾然物我交徹此襍華之大旨爲羣經之元首也與比丘悟入

證十法界入重玄門泯性相而不無示身心而非有
刺血爲墨書寫是經下筆時親見普賢彈指處已叅
慈氏積劫求之而不足半偈得之而有餘當令神物
護持廣作世間饒益

血書蓮經跋

妙理虛玄真乘湛寂念而無念甘露沃其心持而不
持金印封其口所以分身佛集多寶塔來遠近同歸
古今共貫三世如來法施之式十方菩薩悟入之因
謾勞歷劫證修不出刹那圓具然鍾鼓非禮樂之本
而器不可去文字非宗乘之極而書不可無因筌以

得魚藉指而觀月昔藥王然身於淨明德佛釋迦屈
體於阿私陀仙卽以不堅之身了於常住之法慧光
蘭若比丘德慧刺血而書此經畢命以弘斯道毫端
散綺諸天莫不雨花紙上流金大地爲之震動譬夫
膏油相續而燈不滅條甲無間而木向榮慎厥終惟
其始佛法無多子久長難得人勉之

經王尊貴祕藏幽深究竟絕於名言方便令其悟入
自如來開演出彼千齡及羅什再翻成茲七軸受持
讀誦如飲海以無邊書寫流通若量空而不盡潛利
陰益妙用恒沙隨喜讚揚神功叵測粵有比丘惟德

者丹誠貫日素檢懷霜念得度之緣非師不具臻報
恩之極捨佛何由由是發起行雲煉磨心地瀝十指
血終七軸經以報師恩以酬佛廕推此志也豈小緣
哉凡我同流宜加讚歎

書楞嚴經

性覺妙明亘古今而不變本覺明妙在迷悟而皆如
假喻虛空而不空發揮羣相而非相超乎聞見異彼
因緣交光相羅彌滿清淨十方諸佛同宣了義之玄
旨一切眾生咸具圓通之正體只爲客塵擾擾豈知
日用昭昭耳目所拘孰解騎聲蓋色根塵未脫安能

息慮忘緣墮情想之樊籠感昇沈之業報譬如青日
暈此明燈宛若漚花發於巨海外列山河世界中分
鬼畜人天本因織妄而成莫匪瞪勞而現四三宛轉
十二輪環生死成生有無無有直下斷除愛欲還他
調御丈夫自今疾至菩提教我多聞弟子超越五蘊
區宇廓清十種禪那如能宣此呪心乃可制諸外道
利人利己世出世間證不動尊成無上覺未城澄照
沙彌智祚少年苦行銳志禪門具足爍迦羅心書寫
首楞嚴典一誠注相十帙奏功普畢世以受持命讚
才而稱述姑伸梗槩甚愧荒蕪云爾

題十六羅漢畫卷

梵語阿羅漢此翻殺賊應供無生中含三義故東土不翻殺賊者是殺無明賊應供者應天上人間之供無生者了自性涅槃本自不生今亦非滅般若云斷順上分五結永盡名阿羅漢上五結者一色愛謂色界愛二無色愛謂無色界愛三無明謂心不了四掉謂心躁動五慢謂心自高華嚴云上品十善以智慧脩習心狹劣故怖三界故闕大悲故從他聲聞而解了故名聲聞乘此阿羅漢唯佛一人能訶責之令其進修不已而圓佛果餘小衆生不宜輕忽但當恭敬供養求福世出世間而爲津梁外書云千里之行始於足下九層之臺起於累土夫豈不然哉

大悲像記

大悲千手眼者觀音大士應化之身也恭惟大士因地行願可得而言者已備載於諸經若曰神功聖德千變萬化蓋不可得而思議也假使有人以百億須彌山爲筆以百億大海水爲墨以百億娑婆世界爲紙始從今日盡未來際大書特書屢書不一書以摺撫之於百千那由他恒河沙不可說不可說轉分中未能書一分也復次有人以十方空諸佛國土稻麻

竹菁草木叢林悉爲微塵一一塵悉化無量身一一身悉具無量舌一一舌悉縱無量辨始從今日盡未來際顯說密說晝夜說無間歇以贊詠之於百千那由他恒河沙不可說不可說轉分中未能說一分也雖然多之所宗之謂一一卽一切一切卽一其小無內其大無外若然者雖以一丸之土一指之木一銖之金爲之像設亦何異於百萬三千大千世界之身座乎至正四年秋予來主壽山明年與衆議建萬佛寶閣又明年閣成又明年而得耆耄比丘若欽施財造大悲像明年而功就於戲法身固不可以數測今

示其小者特丈六之軀耳其面二十有一其手一千有八其目則如其手之數而加面焉其四十二手各有所執光暎於座座承於足由足下座石至頂上化佛高凡四十尺有奇木用楠桐鬆用朱漆金用純金日光在左月光在右善財龍女常天大權以次列侍驟開戶而望之晃晃乎若七金之山來從海上而屹立於前也大哉施心固不可以物計今標其信者特緡錢一萬餘耳亦豈易耶嘗歎欽之積財儉不爲已旣重飾大殿佛像而復力爲此像人方口之而不置欽獨謙之而不伐斯人也將欲警夫後人也故有作

焉後人也將欲繼夫斯人也宜有述焉若無作又無述雖有此記誰無此記若有作又有述雖無此記誰有此記是不可不記也龍集己丑至正九年春住持梵琦撰

重修釋迦如來真身舍利寶塔頌

諸佛如來出現於世莫不皆示八種之相從初降神誕生乃至出家修道降魔成佛轉法輪最後入涅槃碎紫金軀爲八萬四千舍利使天人龍鬼造塔供養罪滅福生終在菩提我本師釋迦牟尼如來此云能仁寂默當現在賢劫第四佛住兜率天爲護明大士

滿足天尊四千歲補處時至於是下生迦維羅衛國淨飯王宮乘日象入摩耶夫人胎十月滿足從右脇而誕當東震旦國周昭王二十四年甲寅歲四月八日也至四十二年二月八日遊四門踰城出家時年十九歷試邪法摧伏外道穆王三年癸未歲二月八日明星現時成道爲憍陳如等五人轉四諦法輪皆證道果住世說法四十九年後告上首神足摩訶迦葉云吾以清淨法眼涅槃妙心實相無相微妙法門分付於汝汝當護持并勅阿難副貳傳化無令斷絕又付金縷僧伽梨衣轉授慈氏付囑訖卽於熙連河

側娑羅雙樹間右脇累足泊然而逝實穆王五十二年壬申歲二月十五日也閻維火滅八王共分舍利歸國建塔競畱供養滅度一伯年有王名阿育此云無憂取諸塔中所有舍利八萬四千顆造八萬四千塔閻浮聚落滿一億家者耶舍尊者遣鬼神以一塔鎮之按宣律師感通錄震旦塔凡十三所劉薩訶所禮者獨明州阿育王寺舍利光明特盛至誠祈禱必彰感焉梵琦生緣象山九歲出家便聞建塔功德最大往往默感於心天曆元年戊辰歲二月三日住持海鹽州天寧永祚禪寺時年三十四壬申歲建千佛

閣元統二年甲戌歲夢龍王獻寶因募塔緣檀施日臻後至元二年丙子歲春龍化蜿蜒之形於丈室五彩畢備四方來觀之凡兩月而去及塔成復來隱見非一至今祀爲應夢龍王夏填築塔基三年丁丑歲九月二十三日子時起手建塔至辛巳歲奏功凡七層八面高二十四丈莊嚴綺麗見者皆悅越十二年兵興己亥秋失寶瓶計白金二伯兩當是時謝事嘉禾天寧結庵閑居眾請再領寺事乃造鍤石寶瓶取至正二十四年甲辰秋九月二十四日奉瓶修塔天雨寶花明年乙巳歲七月泥蓋方畢自丁丑至乙巳

凡二十有九年矣梵琦年七十瞻禮旋繞歡喜踊躍
百拜稽首而說頌言

如來舍利無有邊不啻八萬四千顆天上人間所造
塔其數過於恒河沙金銀眞珠與瑠璃車渠琥珀及
瑪瑙或用玻梨水晶等并黑沈水赤栴檀種種雕鏤
巧嚴飾所獲妙果不思議或奉一花供一香或但低
頭合指爪或繞一帀禮一拜莫不皆坐菩提場或以
香水洒其地或磨香泥塗其壁或燒油燈作光曜無
有不圓佛智者已去釋迦滅度久塔爲第一之福田
盤如棗葉剎如針其影巍然至梵世譬如虛空平等

入不離塵隙芥子孔我今興建大浮圖亦有先佛眞
身住廣博嚴麗包法界一切如來處其中諸大菩薩
及聲聞莫不俱來受供養天龍八部咸訶護凡有目
者悉觀瞻明月寶珠置其頂寶篋眞言實其腹入夜
銀釭射星斗熾然花開天樹王八角風鈴演妙音七
層欄楯共圍繞普爲衆生作饒益功德高厚若須彌
亦如大海納百川亘古亘今鎮長在願共法界諸含
識同得往生極樂國

韋陀尊天贊

妙高四埵南有提婆其下將軍名曰韋陀位在童眞

護我支那兜鍪鎖甲持杵降魔二十八部三十二將
將中最賢帝釋所仗坐則爲起背則爲向護善遮惡
積德修行末世比丘稟戒不全起居食息實賴尊天
如跛得杖如渡得船受佛付囑願海無邊
水陸陞座

洪武元年九月十一日欽奉

聖旨於蔣山禪寺水陸會中陞座

師云眞如淨境界一泯未嘗存能隨染淨緣遂成
十法界法界者衆生心也衆生心卽佛心大哉心
乎無形無相充徧十方亘古亘今包含萬有但在

衆生分上一向染用謂之無明諸佛分上一向淨
用謂之佛性無明佛性是二俱空然而衆生不了
於空無明所惑從無量劫而至今世因身口意起
貪嗔癡貪行多者二萬一千嗔行多者二萬一千
癡行多者二萬一千等分行者二萬一千共造八
萬四千諸煩惱業生羅王憲死在地獄動經劫數
未有出期古德有言一切苦果因業而受受盡還
無何苦之有豈不見梁朝傅大士心王銘云觀心
空王微妙難測無形無相有大神力能滅千灾成
就萬德體性雖空能施法則觀之無形呼之有聲

攝述
九一
爲之法將心戒傳經水中鹽味色裏膠青決定是
有不見其形又云欲求成佛莫染一物心性雖空
貪嗔體實入此法門端坐成佛豎起拂子云還見
麼無量壽世尊卽今在拂子頭上放大光明普照
十方盡虛空徧法界不可說不可說又不可說極
微塵數三千大千世界百億日月百億四天下百
億四大海百億五須彌百億欲界天宮殿百億色
界天宮殿百億無色界天宮殿於中一一世界天
宮殿內皆有菩薩海眾圍繞隨機說法各各不同
頓說漸說實說權說縱說橫說顯了說蓋覆說凡

有所說皆說此心何一理而不圓何一事而不備
何一塵而不攝何一刹而不收這裏見得未度令
度未解令解未到彼岸者令到彼岸未證涅槃者
令得涅槃

皇恩佛恩一時報畢其或未然更添注脚去也擊拂
子云還聞麼這裏聞去諸人耳在一聲中一聲普
徧諸人耳此是觀音大士圓通法門十方俱擊鼓
十處一時聞此是圓真實隔垣聽音響遐邇俱可
聞此是通真實聲無旣非滅聲有亦非生生滅二
緣離是則常真實是故諸佛於此得之徧十方界

成等正覺菩薩於此得之圓滿六度萬行獨覺於此得之洞明十二緣生聲聞於此得之三明六通證入解脫諸天於此得之高超十地人倫於此得之具足衆善修羅於此得之永絕僑慢地獄於此得之咸脫苦輪乃至餓鬼旁生并及四生九類一切含識於此得之莫不悟自心佛成自心佛金剛般若云過去心不可得未來心不可得現在心不可得心既不可得佛亦不可得菩薩亦不可得獨覺亦不可得聲聞亦不可得諸天亦不可得人倫亦不可得修羅亦不可得餓鬼旁生四生九類一

切含識亦不可得此不可得亦不可得永嘉大師道了了見無一物亦無人亦無佛大千沙界海中漚一切聖賢如雷拂所以二祖神光叅初祖菩提達磨曰我心未寧乞師安心初祖云將心來與汝安神光云覓心了不可得初祖云與汝安心竟以拂子劃一劃云劃斷葛藤正與麼時果滿功圓一句作麼生道將此深心奉塵刹是則名爲報國恩欽惟

皇帝陛下英武仁聖削平海內子育兆民九夷八蠻罔不賓服是以梯山入貢航海獻琛元年大赦天

下洽以寬恩無辜冤枉亦蒙濟拔

特賜銀帑命善世院就蔣山禪寺修建冥陽水陸

大齋一晝夜於中作諸佛事供佛賢聖天地神祇
三界鬼神并召臣僧梵琦舉唱宗乘所集功勛並
用超度四生六道無辜冤枉悉脫幽冥往生佛土
成就菩提所願如意珠燦破無明窟智慧劍截斷
生歿根因大法以悟心趣樂邦而見佛復舉梁朝
武帝請傅大士講經大士登座揮尺一下寶公菩
薩謂帝曰陛下還會麼帝默然菩薩云大士講經
竟師拈云今日

聖恩令臣僧梵琦陞於此座舉揚第一義諦普願迷
流同成佛道釋迦老子四十九年說不盡底細大
法門盡被傅大士一時吐露了也且道節文在什
麼處冥陽水陸大齋緣徧滿三千與大千東走金
烏西玉兔上竈碧落下黃泉永拋業識無明海高
坐如來妙寶蓮恩重須彌何以報祝延

聖壽萬斯年

洪武二年三月十三日欽奉

聖旨於蔣山禪寺水陸會中陞座

師云震法雷擊法鼓布慈雲兮洒甘露卽今法雷

撰述
卷二十一
三
巴震法鼓已擊慈雲已布甘露已洒且道山僧說甚麼法說向聲聞乘法耶說向獨覺乘法耶說向菩薩乘法耶說向阿耨多羅三藐三菩提法耶說向凡夫界法耶說向中道法界中無有法名向聲聞乘向獨覺乘向菩薩乘向阿耨多羅三藐三菩提無有法名向凡夫界無有法名向洙向淨向生處向涅槃何以故諸法無二故譬如虛空若去來今求不可得然非無虛空據實而論只遮虛空早是釘橛了也雲門手中扇子踔跳上三十三天觸著帝釋鼻孔東海鯉魚打一棒雨似盆傾諸人又作

麼生會良久云不起纖毫修學心無相光中常自在又云不是心不是佛不是物是箇什麼明白道了也更要解註那此事不在言語上十雙五箇作言語會苦哉屈哉香巖和尚道如人上樹手不攀枝脚不踏枝樹下忽有人問祖師西來意若答他則喪身失命若不答他則違他所問答則是不答則是大慧和尚云我這裏禪如一團火相似若觸他則燒殺你若背他則凍殺你只如永嘉大師有兩句子與賊過梯道什麼鏡裏看形見不難水中捉月爭拈得平如鏡面險似懸崖金剛取泥處是

撰述
我屋裏人知得更饒箇古話吾宗第四祖優波鞠
多尊者因一族姓子出家夜投天寺宿尊者乃作
方便化一夜叉擔一死人來更有一夜叉空手而
至二鬼共諍一言我擔死人來第二者言我擔死
人來前一鬼言我有證人此人見我擔死人來時
此人念言我今必定死應作實語語後鬼言此死
人者前鬼擔來非是汝許後鬼大瞋拔其一臂前
鬼以死人臂還續如故後鬼復拔一臂前鬼更拔
死人臂還復補處後鬼拔其兩脚前鬼悉以死人
脚補之如本如是二鬼共食所拔新肉即便出去

此族姓子豁然大悟今日

聖天子普度幽冥令臣僧梵琦說法度諸佛子所與
一言之下泮然無疑知一切法卽心自性成就慧
身不由他悟如夢忽覺如蓮花開正恁麼時如何
舉似一百五日近清明上元定是正月半復舉昔
有士人撰無鬼論鬼現身云我聾士人無對後來
五祖演和尚代以兩手合作鵝鳩嘴云谷谷呱師
拈云五祖和尚可謂是千聖頂上拈來萬人叢中
指出語默所不到情解所不及向上一句作麼論
量常憶江南三月裏鷓鴣啼處百花香

楚石和尚行狀

師諱楚琦字楚石小字曇曜明州象山人姓朱氏父杲好善有隱德母張事佛惟謹以大元元貞二年丙申之歲六月丁巳夢日墮懷中而生師師在襁褓中有神僧來見之謂其父曰此兒佛也他日必當振佛法照曜濁世宗族鄉黨因以曇曜字之四歲失怙恃祖母王氏鞠之口授以論語輒能成誦或問書中所好者何語卽應曰君子喻於義六歲善屬對七歲能書大字詩書過目不忘一邑以奇童稱之九歲抵西泚從海鹽天寧訥翁模公受

經業又依從族祖晉翁洵公於湖之崇恩趙文敏公以先隴在崇恩數往來其間每見師異之爲鬻僧牒禮訥翁得度年十六於杭之昭慶受具戒爲大僧是時文采炳蔚聲光藹著兩泚名山宿德爭欲招致座下徑山虛谷陵天童雲外岫淨慈晦機熙各有龍象數伯更稱譽之年二十晉翁遷道場命爲侍者旣又俾典藏鑰一日閱首楞嚴經至緣見因明暗成無見不明自發則諸暗相承不能昏因有省入由是閱內外典籍宛如宿習然於佛祖向上一着終有滯礙元叟端和尚主徑山道望重

撰述
天下師往叅次卽問如何是言發非聲色前不物
叟遽云言發非聲色前不物速道速道師擬進語
叟震威一喝師乃錯愕而退會英宗皇帝詔善書
者赴闕金書大藏經師在選中辭叟遂行旣至館
於萬寶坊近崇天門一夕睡起聞綵樓上鼓鳴豁
然大悟徹見徑山爲人處述偈曰崇天門外鼓騰
騰驀劄虛空就地崩拾得紅爐一片雪却是黃河
六月氷實甲子正月十一日也是歲東歸再叅元
叟於徑山叟迎笑曰且喜汝大事了畢自是師資
徵決佛祖機緣渙然矣叟遂以第二座延之而學

者多諮扣焉未幾以行宣政院命出世海鹽州之
福臻一香供元叟是爲妙喜五世云天曆戊辰遷
州之天寧至元乙亥遷杭之報國至正甲申遷嘉
興郡之本覺丁亥帝師錫號曰佛日普照慧辯禪
師丁酉遷郡之天寧己亥有退休志以海鹽天寧
有山海之勝遂築寺西偏以居別自號西齋老人
癸卯寺主者祖光告寂州大夫強師復主寺事戊
申舉得法上首景獻自代而復老於西齋焉
皇明啓運混一海宇

天子念將臣或沒於戰民庶或歿於兵宐以釋氏法

設宴以濟拔之於是洪武元年九月十一日徵師說法於蔣山廷臣奏其說

上大悅明年三月復用元年故事再徵於蔣山說法上聞其說又大悅十五日

賜宴文樓下親承

勞問

詔館於天界寺十日及行出內府白金以

賜又明年秋

上以鬼神之理甚幽意先佛必有成說宜徵其徒之嘗爲師德者問焉於是泐水東西被

召者凡十有六人予與師泊夢堂噩公與焉七月十

二日至天界館於方丈

上命禮部官勞又命膳部賜薪米等物尋以所問命講究明白候齋日奏對而師以二十二日示微疾然與諸師援據經論辨嚴其理自若也二十六日忽索浴更衣跣趺書偈曰真性圓明本無生滅木馬夜鳴西方日出置筆謂夢堂曰師兄我去也堂曰何處去師曰西方去堂曰西方有佛東方無佛耶師乃震威一喝而逝禮部官以遺偈聞

上爲嗟悼久之翰林學士宋公景濂危公太樸與師

爲方外友尤痛惻焉龕奉四日顏色愈明潤縉白
瞻禮如佛涅槃天界住持白菴金禪師乃古鼎銘
和尚嗣法上首師之法門猶子也凡後事莫不盡
禮同召諸師咸以法供養焉時例禁火化

上以師故特開僧家火化之例是日天宇清霽送者
千餘人火餘牙齒舌根數珠不壞舍利五色紛綴
遺骸叅學弟子文晟奉其遺骸及諸不壞者歸海
鹽以八月二十八日葬於西齋而塔焉師平日度
人或以文字而作佛事六會語梓傳已久外有淨
土詩慈氏上生偈北遊集鳳山集西齋集又有和

天台三聖詩永明壽禪師山居詩陶潛詩林逋詩
總若干卷竝行於世師所旌施者雲集凡所營建
咄嗟成功在海鹽天寧建大毗盧閣範銅肖毗盧
遮那佛千佛文殊普賢大悲千手眼菩薩等像位
置上下相好殊勝又建寶塔七層高計二伯四十
餘尺塔成忽偏倚欲仆師懼禱于佛一夕大風雨
州民間空中有聲曰急往天寧救塔明日塔乃四
正如初及師再來塔以兵燹殆廢且失頂之寶瓶
師復鳩施完葺之時景獻爲徑山書記以錢命鑄
寶瓶補之上瓶之日天花紛雨異香滿空州民聚

觀駭嘆無已在本覺建大閣上以奉萬佛下以奉
大悲菩薩十地菩薩閣之雄偉像設之莊嚴殆冠
西泐師爲人身短小而志器弘大體無爲而神應
莫測熾然作用無非以實相示人俾之悟焉證焉
而後已故雖有營建之美辭辨之富而實無作也
無說也譬猶春之於花月之於水所可形容者影
與色香耳道化所被薄海內外高麗日本學者尤
欽慕焉世壽七十五僧臘六十有三得度者若干
人嗣其法者若干人景獻文晟將謁辭於當代大
手筆以銘其塔以昭示來學請予錄其行實予始

在徑山與師交甚并又同稟法於元叟和尚其後
往來東西浙得師出處爲詳洎師示滅又親覩其
光明之効不可辭也第以衰病紀次繁陋然立言
君子於斯或有所稽焉洪武庚戌九月初吉前住
紹興府崇報禪寺法弟至仁謹狀

佛日普照慧辯禪師塔銘有序

皇帝卽位洪武之元年端居穆清憫念四海兵爭將
卒民庶多歿於非命精爽無依非佛世尊不足以
度之秋九月

詔江南大浮圖十餘人於蔣山禪寺作大法會時楚

石禪師實與其列師升座說法以聳人天龍鬼之聽竣事近臣入奏

上大悅二年春三月復用元年故事

召師說法如初錫燕於文樓下親承

顧問暨還出內府白金以賜三年之秋

上以鬼神情狀幽微難測意遺經當有明文妙東僧中通三藏之說者問焉師與夢堂靈公行中仁公等應

召而至館于大天界寺

上命儀曹勞之既而援據經論成書將入

朝敷奏師忽示微疾越四日趣左右具浴更衣索筆書偈曰真性圓明本無生滅木馬夜鳴西方日出書畢謂夢堂曰師兄我將去矣夢堂曰子去何之師曰西方爾夢堂曰西方有佛東方無佛耶師厲聲一喝泊然而化時七月二十六日也天界住持西白金公法門猶子也爲治後事無不盡禮時制火葬有禁禮部以聞

上特命從其教荼毗之餘齒牙舌根數珠咸不壞舍利羅粘綴遺骨纍纍然如珠其弟子文晟奉骨及諸不壞者歸於海鹽卜以八月二十八日建塔于

天寧永祚禪寺葬焉既葬嗣法上首景獻復偕文
晟以仁公所造行狀來徵銘仁公博通內外典文
辭簡奧有西漢風其言當可信弗誣謹按狀師諱
楚琦楚石其字也小字曇曜明州象山人姓朱氏
父杲母張氏張夢日墮懷而生師方在襁褓中有
神僧摩其頂言曰此佛日也他時能照燭昏衢乎
人因名之爲曇曜云年七歲靈性穎發讀書卽了
大意或問所嗜何言卽應聲曰君子喻於義至於
屬句做書皆度越餘子遠近號爲奇童九歲棄俗
入永祚受經於訥翁模師尋依晉翁洵師於湖之

崇恩洵師師從放祖也趙魏公見師器之爲鬻僧
牒得難染爲沙門繼往杭之昭慶受具足戒年已
十有六矣洵師遷住道場師爲侍者居亾何命司
藏室閱首楞嚴經至緣見因明暗成無見處恍然
有省歷覽羣書不假師授文句自通然膠於名相
未能釋去纏縛聞元叟端公倡道雙徑師往問云
言發非聲色前不物其意何如元叟就以師語詰
之師方擬議欲答叟咄之使出自是羣疑塞曾如
填鉅石會元英宗詔粉黃金爲泥書大藏經有司
以師善書選上燕都一夕聞西城樓鼓動汗下如

雨拊几笑曰徑山鼻孔今日入吾手矣因成一偈
有拾得紅爐一點雪却是黃河六月水之句翻然
東旋再入雙徑元叟見師氣貌克然謂曰西來密
意喜子已得之矣遠處以第二座且言妙喜大法
盡在於師有來叅叩者多命師辯決之元泰定中
行宣政院稔師之名命出世海鹽之福臻遂升主
永祚永祚師受經之地爲創大寶閣範銅鑄賢劫
千佛而毗盧遮那及曼殊師利普賢千手眼觀音
諸像竝寘其中復造塔婆七級崇二伯四十餘尺
功坐就勢將偏壓師禱之夜乃大雨風居氓聞鬼

神相語曰天寧塔偏亟往救之遲明塔正如初遷
杭之報國轉嘉興之本覺更構萬佛閣九楹間宏
偉壯麗儼如天宮下移人世帝師嘉其行業賜以
佛日普照慧辯禪師之號佛日頗符昔日神僧之
言識者異焉會報恩光孝虛席僉謂報恩一郡巨
刹非師莫能居之師勉徇衆請而往尋退隱永祚
築西齋爲終焉之計至正癸卯州大夫強師主其
寺事時塔燬于兵師重成之景獻爲代復歸老于
西齋云師爲人形軀短小而神觀精朗舉明正法
滂沛演迤有不知其所窮凡所蒞之處黑白嚮慕

如木歸壑一彈指間湧殿飛樓上插雲際未嘗見
師有作君子謂師縱橫自如應物無跡山川出雲
雷蟠電掣神功收斂寂然無聲由是內而燕齊秦
楚外而日本高麗咸咨決心要奔走座下得師片
言裝潢襲藏不翅拱壁師可謂無愧妙喜諸孫者
矣師世壽七十五僧臘六十三得法者若干人受
度者若干人其說法機用則見於六會語其遊戲
翰墨則見於和天台三聖及永明壽陶潛林逋諸
作別有淨土詩慈氏上生偈北遊鳳山西齋三集
通合若干卷竝傳于世余慕師之道甚久近獲執

手護龍河上相與談玄因出賸語一編求正師覽
已嘆曰不意儒者所造直至於此善自護持之師
善誘推此一端亦可槩見及聞師歿與國史危公
哀悼不自勝危公亦深知師者也銘曰

大鑒密旨餘十傳妙喜起蹴龍象筵有如大將據
中堅鐵卒十萬佩橐鞬或觸之者命髮懸誰欺五
世稱象賢佛日曉出瀛海暝紅燄閃閃行中邊派
光所至無幽玄憶初飛錫來北燕彤樓畫鼓金星
纏一擊三際皆廓然火中新敷清淨蓮紺色涵空
絕蔓牽自茲口噴百丈泉洗滌五濁離腥羶內而

諸夏外朝鮮紛紛來者人駕肩示以實相非空言
塔廟赫絕名山川一佛能變萬與千會萬歸一道
則全不識誣爲有漏緣

帝勅中使來傳宣鍾山說法超沈縣萬人瞻依曲兩
拳一朝入滅同蛻蟬西方彈指即現前白玉樓閣
瑠璃田金鈴寶樹演真詮師之往矣神弗遷寂光
常定無偏圓我作銘詩翠琰鐫昭朗盛烈坐年年
翰林學士亞中大夫知

制誥兼修

國史金華宋濂撰并書

翰林侍講學士中順大夫知

制誥同修

國史臨川危素篆題

佛日普照慧辯楚石禪師語錄卷第二十

音切

瞪直耕切 譟卽袋切 拮居運切 據之石切 髮許求切 蛻於阮切 蜓

以然切 登莫候切 劃平麥切 璞敕金切 毳巨六切 洵相均切 蔚於物切

切 醜吾各切 骼柯額切 燹先踐切 璫胡官切 竣且旬切 纍力追切

切 糴託計切 綈如枕切 燬磨詭切 迤以支切 臙孕古切 囊古刀切 韃居言切

切 啜仁緣切 施喜刀切 蛻弋毒切

秀水陳門張氏施貲刻此
 楚石禪師語錄第二十卷祈福慧兩嚴忽親胥利
 盡斯報命生彼樂邦 昆明沙彌真玄對 眞州
 王國英書 廬陵鍾惠刻
 萬曆庚寅秋五臺山妙德庵識



中鄭大夫賦

七

十

檢定是圖本仍在上中下之

